

四庫全書

史部

欽定四庫全書

史部

前漢書卷九十九下

詳校官侍讀臣陳萬青

洗馬臣王坦修覆勘

覆校官中書臣馮培

校對官中書臣汪日章

謄錄監生臣陸維新

欽定四庫全書

前漢書卷九十九中

漢

蘭

臺

令

史班固撰

唐正議大夫侍秘書少監琅邪縣開國子顏師古注

王莽傳第六十九中

始建國元年正月朔莽師公侯卿士奉皇太后璽韞上

天皇太后

師古曰韞謂璽之紐音弗

順符命去漢號焉初莽妻宜春

侯王氏女立為皇后

師古曰王詡為丞相初封宜春侯傳爵至孫咸莽妻咸之女

本

生四男宇獲安臨二子前誅死安頗荒忽

師古曰荒音呼廣反

廼

以臨為皇太子安為新嘉辟

師古曰辟君也謂之辟者取為國君之義音壁

封

宇子六人千為功隆公壽為功明公吉為功成公宗為

功崇公世為功昭公利為功著公大赦天下莽乃策命

孺子曰咨爾嬰昔皇天右乃太祖

師古曰右讀曰佑佑助也

歷世十

二享國二百一十載歷數在于予躬詩不云乎侯服于

周天命靡常

師古曰大雅文王之詩也言殷之後嗣乃為諸侯服事周室是天命無常也謂微子

為宋公也封爾為定安公永為新室賓於戲

師古曰於戲音曰嗚呼敬

天之休

師古曰休美也

往踐乃位毋廢予命又曰其以平原安

德漂陰鬲重丘凡戶萬地方百里為定安公國

師古曰五縣也

漂音它合反鬲音與隔同

立漢祖宗之廟於其國與周後並行其正

朔服色世世以事其祖宗永以命德茂功享歷代之祀

焉以孝平皇后為定安太后讀策畢莽親執孺子手流

涕歔歔

師古曰歔音虛歔音許氣反

曰昔周公攝位終得復子明辟

今予獨迫皇天威命不得如意哀嘆良久中傳將孺子

下殿北面而稱臣百僚陪位莫不感動又按金匱輔臣

皆封拜以太傅左輔驃騎將軍

○宋祁曰驃字當去旁馬字

安陽侯

王舜為太師封安新公大司徒就德侯平晏為太傅就

新公少阿羲和京兆尹紅休侯劉歆為國師嘉新公廣

漢梓潼哀章為國將美新公是為四輔位上公太保後

丞承陽侯甄邯為大司馬承新公

師古曰承陽音烝陽○宋祁曰少阿晉灼

音義作少阿訓阿取阿衡一字也音依倚之倚李奇音奇紅休南本作林字承南本作丞

丕進侯

王尋為大司徒章新公步兵將軍成都侯王邑為大司

空隆新公是為三公大阿右拂大司空衛將軍廣陽侯

甄豐為更始將軍廣新公

師古曰拂讀曰弼

京兆王興為衛將

軍奉新公輕車將軍成武侯孫建為立國將軍成新公

京兆王盛為前將軍崇新公是為四將凡十一公王興

者故城門令史王盛者賣餅莽案符命求得此姓名十

餘人兩人容貌應卜相徑從布衣登用以視神焉

師古曰視

讀曰示餘皆拜為郎是日封拜卿大夫侍中尚書官凡數

百人諸劉為郡守皆徙為諫大夫改明光宮為定安館

定安太后居之以故大鴻臚府為定安公第

○宋祁曰邵本無故

字新本添皆置門衛使者監領敕阿乳母不得與語常在四

壁中孟康曰令定安公居四壁中不得有所見至於長大不能名六畜後莽

以女孫宇子妻之莽策羣司曰歲星司肅東嶽太師典

致時雨應劭曰貌之不恭是謂不肅肅敬也厥罰常雨常雨水也故申戒厥任欲使雨澤以時也晉灼

曰衆物生於東方故戒太師也青煒登平考景以晷服虔曰煒音暉如淳曰青氣之光輝

也晉灼曰言青陽之氣始升而上以成萬物也春秋分立表以正東西東日之始出也故考景以晷屬焉熒

惑司愆南嶽太傅典致時奧應劭曰視之不明是謂不愆愆智也厥罰常燠燠暑

也晉灼曰南方陽盛之位太傅師尊之稱故戒之也師古曰奧音於六反韋昭曰司愆南方曰視君視明則臣

聰赤煒頌平考聲以律

晉灼曰頌寬頌也夏假也物假大乃宣平也六月陰氣之始故

為地統地之中數六六為律律有形有色色尚黃故考聲以律屬焉師古曰頌讀曰容

太白司艾

西嶽國師典致時陽

應劭曰言之不從是謂不艾艾安也厥罰常陽陽旱也師古曰艾讀

又白煒象平考量以銓

應劭曰量斗斛也銓權衡也晉灼曰象形也萬物無不成形於

西方大小輕重皆可不知故稱量屬焉

辰星司謀北嶽國將典致時寒

應劭曰聰

之不聰是謂不謀謀圖也厥罰常寒晉灼曰北伏也陽氣伏於下陰主殺故戒國將

玄煒和平考

星以漏

應劭曰推五星行度以漏刻也晉灼曰和合也萬物皆合藏於北方水又主平故曰和平歷度

起於斗分日月紀於攝提攝提值斗杓所指以建時節故考星屬焉

月刑元股左司馬典

致武應考方法矩

張晏曰月為刑司馬主武又典天故使主威刑也

主司天文

欽若昊天敬授民時力來農事以豐年穀

師古曰欽敬也若順也力

來勸勉之也來音郎代反

日德元宏右司徒典致文瑞考圜合規

張晏

曰日為陽位晉灼曰宏圜也五教在寬則和氣感物四靈見象故文瑞屬焉師古曰宏古肱字

主司人

道五教是輔帥民承上宣美風俗五品乃訓

師古曰五教謂父義

母慈兄友弟恭子孝也五品即五常謂仁義禮智信

斗平元心中司空典致物圖

考度以繩

張晏曰斗北斗也主齊七政司空主水土土為中故責之孟康曰易河出圖洛出書司空

主水土責以其物也晉灼曰中央為四季土土者信信者直故為繩

主司地里平治水土

掌名山川衆殖鳥獸蕃茂草木各策命以其職如典誥

之文置大司馬司允大司徒司直大司空司若位皆孤

卿

師古曰允信也若順也

更名大司農曰羲和後更為納言大理

曰作士太常曰秩宗大鴻臚曰典樂少府曰共工

師古曰共

讀曰龔

水衡都尉曰予虞與三公司卿凡九卿分屬三公

每一卿置大夫三人一大夫置元士三人凡二十七

大夫八十一元士分主中都官諸職

○宋祁曰或無官字

更名光祿

勳曰司中太僕曰太御衛尉曰太衛執金吾曰奮武中

尉曰軍正

○劉攽曰中尉廢久此安得更名蓋是中壘校尉脫兩字

又置大贅官主

乘輿服御物

師古曰贅聚也言財物所聚也贅音之銳反○劉奉世曰贅讀如虎賁綴衣之綴

後又典兵秩位皆上卿號曰六監改郡太守曰大尹都

尉曰太尉縣令長曰宰御史曰執法公車司馬曰王路

四門長樂宮曰常樂室未央宮曰壽成室前殿曰王路

堂

服虔曰如言路寢也

長安曰常安更名秩百石曰庶士三百石

曰下士四百石曰中士五百石曰命士六百石曰元士

千石曰下大夫比二千石曰中大夫二千石曰上大夫

中二千石曰卿車服黻冕各有差品

師古曰此黻謂衣裳之黻

又置

司恭司徒

○劉攽曰徒改從

司明司聰司中大夫及誦詩工徹

膳宰以司過策曰予聞上聖欲昭厥德罔不慎脩厥身

用綏于遠是用建爾司于五事毋隱尤毋將虛

師古曰尤過也

將助也虛謂虛美也言勿隱吾過而助為虛美

好惡不愆立于厥中

師古曰愆違也於

戲勗哉

師古曰於戲讀曰嗚呼勗勉也

令王路設進善之旌非謗之木

欲諫之鼓

師古曰非音誹

諫大夫四人常坐王路門受言事者

封王氏齊繆之屬為侯大功為伯小功為子總麻為男

其女皆為任

師古曰任充也男服之義男亦任也音壬

男以睦女以隆為號

焉

師古曰睦隆皆其受封邑之號取嘉名也

皆授印韞

師古曰韞亦印之組次下並同

令諸

侯立大夫夫人世子亦受印韞又曰天無二日土無

二王百王不易之道也漢氏諸侯或稱王至于四夷亦

如之違於古典繆於一統其定諸侯王之號皆稱公及

四夷僭號稱王者皆更為侯又曰帝王之道相因而通

盛德之祚百世享祀予惟黃帝帝少昊帝顓頊帝嚳帝

堯帝舜帝夏禹皋陶伊尹咸有聖德假于皇天

師古曰假至也

升也音工雅反

功烈巍巍光施于遠

○宋祁曰施一本作化

予甚嘉之營

求其後將祚厥祀惟王氏虞帝之後也出自帝嚳劉氏

堯之後也出自顓頊於是封姚恂為初睦侯奉黃帝後

服虔曰姚舜姓故封為黃帝後○宋祁曰字書恂信也音詢

梁護為脩遠伯奉少昊

後

服虔曰以為伯益之後故封之

皇孫功隆公千奉帝嚳後劉歆為祁

烈伯奉顓頊後國師劉歆子疊為伊休侯奉堯後

師古曰上

言紅休侯劉歆為國師嘉新公今此云劉歆為祁烈伯又言國師劉歆子為伊休侯是則祁烈伯自別一劉歆

非國師也○宋祁曰伊休疑是紅休

媯昌為始睦侯奉虞帝後山導為褒

謀子奉臯陶後伊尹為褒衡子奉伊尹後漢後定安公

劉嬰位為賓周後衛公姬黨更封為章平公亦為賓殷

後宋公孔弘運轉次移更封為章昭侯位為恪

師古曰恪敬也

言待之加敬亦如賓也周以舜後并祀宋為三恪也

夏後遼西姁豐封為章功侯

亦為恪

服虔曰姁夏姓

四代古宗宗祀于明堂以配皇始祖考

虞帝周公後褒魯子姬就宣尼公後褒成子孔鈞已前

定焉莽又曰予前在攝時建郊宮定祧廟立社稷

師古曰達

祖曰祧音吐堯反○劉奉世曰四代以下十七字其義不倫莽方封先聖後未當及此且已有後文此字當衍

神祇報況

師古曰況賜也

或光自上復于下流為烏

師古曰復音扶目反

或黃氣熏烝昭耀章明以著黃虞之烈焉

師古曰烈餘業也自云承

黃虞之後

自黃帝至于濟南伯王而祖世氏姓有五矣

師古曰濟

南伯王莽之高祖

黃帝二十五子分賜厥姓十有二氏虞帝之

先受姓曰姚其在陶唐曰嫫在周曰陳在齊曰田在濟

南曰王予伏念皇初祖考黃帝皇始祖考虞帝以宗祀

于明堂

○宋祁曰南本云皇姓始祖考以當作已

宜序於祖宗之親廟其立

祖廟五親廟四后夫人皆配食郊祀黃帝以配天黃后

以配地

孟康曰黃帝之后也

以新都侯東第為大祿歲時以祀

師古

曰祿祀也立此大祠

家之所尚種祀天下

師古曰言國已立大祿祠

常以歲時祀其先也

先祖矣其衆庶之家所尚者各令傳祀勿絕普天之下

同其法

○劉奉世曰此謂莽家所尚之種祀示令天下

傳以為種祠不得不奉祀

姚嬀陳田王氏凡五姓者皆

黃虞苗裔予之同族也書不云乎惇序九族

師古曰虞書咎繇謨

之辭也惇厚也

其令天下上此五姓名籍于秩宗皆以為宗室

世世復無有所與

師古曰復音方目反與讀曰預

其元城王氏勿令相

嫁娶以別族理親焉

師古曰元城王氏不得與四姓昏娶以其同祖也餘它王氏則不禁

焉封陳崇為統睦侯奉胡王後孟康曰追王陳胡公田豐為世睦

侯奉敬王後孟康曰追王陳敬仲天下牧守皆以前有翟義趙明

等領州郡懷忠孝封牧為男守為附城又封舊恩戴崇

金涉箕閼陽並等子皆為男遣騎都尉囂等師古曰囂音許驕反

分治黃帝園位於上都橋時師古曰橋山之上故曰橋時也○劉敞曰都當作郡

虞帝於零陵九疑胡王於淮陽陳敬王於齊臨淄愍王

於城陽莒服虔曰齊愍王伯王於濟南東平陵孺王於魏郡元

城師古曰莽之高祖名遂字伯紀曾祖名賀字翁孺故謂之伯王孺王使者四時致祠其

廟當作者以天下初定且祫祭於明堂太廟以漢高廟

為文祖廟

師古曰欲法舜受終於文祖

莽曰予之皇始祖考虞帝受

壇于唐

師古曰壇古禪宇

漢氏初祖唐帝世有傳國之象

師古曰堯

傳舜漢傳莽自以舜後故言有傳國之象

予復親受金策於漢高皇帝之靈

惟思褒厚前代何有忘時漢氏宗祖有七

蘇林曰漢本祀祖宗有四

莽以元帝成帝平帝為宗故有七

以禮立廟于定安國其園寢廟在京

師者勿罷祠薦如故予以秋九月親入漢氏高元成平

之廟諸劉更屬籍京兆大尹勿解其復各終厥身

師古曰復

音方
目反
州牧數存問勿令有侵寬又曰予前在大麓至于

攝假

師古曰大麓者謂為大司馬宰衡時妄引舜納于大麓烈風雷雨不迷也攝假謂初為攝皇帝又為

假皇

帝
深惟漢氏三七之阨赤德氣盡思索廣求

師古曰索亦求

也音山

各反
所以輔劉延期之術靡所不用以故作金刀之

利幾以濟之

師古曰幾讀曰冀

然自孔子作春秋以為後王法

至于哀之十四而一代畢協之於今亦哀之十四也

張晏

曰漢哀帝即位六年平帝五年居攝三年凡十四年

赤世計盡終不可強濟皇天

明威黃德當興隆顯大命屬予以天下

師古曰屬音之欲反

今百

姓咸言皇天革漢而立新

師古曰革改也

廢劉而興王夫劉之

為字卯金刀也正月剛卯金刀之利皆不得行

服虔曰剛卯以

正月卯日作佩之長三寸廣一寸四方或用玉或用金或用桃著革帶佩之今有玉在者銘其一面曰正月剛

卯金刀莽所鑄之錢也晉灼曰剛卯長一寸廣五分四

方當中央從穿作孔以采絲葺其底如冠纓頭黠刻其

上面作兩行書文曰正月剛卯既央靈受四方赤青白

黃四色是當帝令祝融以教夔龍庶疫剛痺莫我敢當

其一銘曰疾日嚴卯帝令夔化順爾固伏化茲靈受既

正既直既觚既方庶疫剛痺莫我敢當師古曰今往往

有土中得玉剛卯者葉大小及衣服說是也莽以劉

字上有卯下有金旁又有刀故禁剛卯及金刀也博

謀卿士僉曰天人同應昭然著明其去剛卯莫以為佩

除刀錢勿以為利承順天心快百姓意乃更作小錢徑六分重一銖文曰小錢直一與前大錢五十者為二品並行欲防民盜鑄乃禁不得挾銅炭是歲四月徐鄉侯劉快結黨數千人起兵於其國

師古曰快膠東恭王子也而王子侯表作快字

從火與此不同疑表誤○宋祁曰越本無是歲二字韋昭云徐鄉東萊縣也

快兄殷故漢膠

東王時改為扶崇公快舉兵攻即墨殷閉城門自繫獄吏民距快快敗走至長廣死莽曰昔予之祖濟南愍王困於燕寇自齊臨淄出保于莒宗人田單廣設奇謀獲

殺燕將復定齊國今即墨士大夫復同心殄滅反虜予甚嘉其忠者憐其無辜其赦殷等非快之妻子它親屬當坐者皆勿治弔問死傷賜亡者葬錢人五萬殷知大命深疾惡快以故輒伏厥辜其滿殷國戶萬地方百里又封符命臣十餘人莽曰古者設廬井八家一夫一婦田百畝什一而稅則國給民富而頌聲作師古曰此唐給足也虞之道三代所遵行也秦為無道厚賦稅以自供奉罷民力以極欲師古曰罷讀曰疲壞聖制廢井田是以兼并起貪

鄙生强者規田以千數弱者曾無立錫之居又置奴婢

之市與牛馬同蘭

師古曰蘭謂遮蘭之若牛馬蘭園也

制於民臣顓斷其

命姦虐之人因緣為利至略賣人妻子逆天心誅人倫

師古曰誅亂也詩音布內反

繆於天地之性人為貴之義

師古曰孝經稱孔子

曰天地之性人為貴故引之性生也

書曰子則奴戮女

師古曰夏書甘誓之辭也奴戮戮之

以為奴也說書者以為孥子也戮及妻子此說非也秦誓云囚奴正士豈及子之謂乎女讀曰汝

唯不

用命者然後被此辜矣漢氏減輕田租三十而稅一常

有更賦罷癘咸出

師古曰更音工衛反罷音疲癘音隆

而豪民侵陵分田

劫假厥名三十稅一實什稅五也

師古曰解並
在食貨志

父子夫

婦終年耕芸

師古曰芸
字與耘同

所得不足以自存故富者犬馬

餘菽粟驕而為邪貧者不厭糟糠窮而為姦

師古曰
厭飽也

俱

陷于辜刑用不錯

師古曰錯置也音千故反
○宋祁曰越本辜作臯

予前在大

麓始令天下公田口井

師古曰計口
而為井田

時則有嘉禾之祥

遭反虜逆賊且止今更名天下田曰王田奴婢曰私屬

皆不得賣買其男口不盈八而田過一井者分餘田予

九族鄰里鄉黨故無田今當受田者如制度敢有非井

田聖制無法惑衆者投諸四裔以禦魑魅

師古曰魑山神也魅老物

精也魑音螭魅音媚

如皇始祖考虞帝故事是時百姓便安漢五

銖錢以莽錢大小兩行難知又數變改不信皆私以五

銖錢市買訛言大錢當罷莫肯挾莽患之復下書諸挾

五銖錢言大錢當罷者比非井田制投四裔於是農商

失業食貨俱廢民人至涕泣於市道及坐賣買田宅奴

婢鑄錢自諸侯卿大夫至于庶民抵罪者不可勝數秋

遣五威將王奇等十二人班符命四十二篇於天下德

祥五事符命二十五福應十二凡四十二篇其德祥言

文宣之世黃龍見于成紀新都高祖考王伯墓門梓柱

生枝葉之屬符命言井石金匱之屬福應言雌雞化為

雄之屬其文爾雅依託皆為作說

師古曰爾雅近正也謂近於正經依古義

而為之說大歸言莽當代漢有天下云總而說之曰帝王受

命必有德祥之符瑞協成五命申以福應

師古曰五命謂五行之次

相承以受命也申重也

然後能立巍巍之功傳于子孫永享無窮

之祚故新室之興也德祥發於漢三七九世之後

蘇林曰二

百一十歲
九天子也

肇命於新都受瑞於黃支

孟康曰獻生犀○
宋祁曰注文孟康

曰下當有
黃支二字

開王於武功定命於子同

孟康曰梓潼
縣也莽改也成命

於巴宕

晉灼曰巴郡
宕渠縣也

申福於十二應天所以保佑新室

者深矣固矣武功丹石出於漢氏平帝末年火德銷盡

土德當代皇天眷然去漢與新以丹石始命於皇帝皇

帝謙讓以攝居之未當天意故其秋七月天重以三能

文馬

服虔曰三台星也晉灼曰許慎說文馬縞身
金精周成王時犬戎獻之師古曰能音台

皇帝

復謙讓未即位故三以鐵契四以石龜五以虞符六以

文圭七以玄印八以茂陵石書九以玄龍石十以神井
十一以大神石十二以銅符帛圖申命之瑞寢以顯著

師古曰
寢漸也

至于十二以昭告新皇帝皇帝深惟上天之威

不可不畏故去攝號猶尚稱假改元為初始欲以承塞

天命克厭上帝之心

師古曰塞當
也厭滿也

然非皇天所以鄭重

降符命之意

師古曰鄭重猶言頻
煩也重音直用反

故是日天復決其所

以勉書

孟康曰哀章所作策書也言數有瑞應莽自謙
居攝天復決其疑勸勉令為真也晉灼曰勉字

當為龜是日自復有龜書及天下金匱圖策事也師古
曰孟說是○宋祁曰別本無復決其三字邵本無其字

又侍郎王盱見人衣白布單衣赤績方領

師古曰績者會五采也以

布為單衣以赤加績為其方領也盱音許于反績音胡內反

冠小冠立于王路殿前

謂盱曰今日天同色以天下人民屬皇帝

師古曰同色者言五方天

神共齊其謀同其顏色也字或作色包者言天總包括天下人衆而與莽也其義兩通屬委也音之欲反盱

恠之行十餘步人忽不見至丙寅暮漢氏高廟有金匱

圖策高帝承天命以國傳新皇帝明旦宗伯忠孝侯劉

宏以聞乃召公卿議未決而大神石人談曰趣新皇帝

之高廟受命毋留

師古曰趣讀曰促

於是新皇帝立登車之漢

氏高廟受命受命之日丁卯也丁火漢氏之德也卯劉

姓所以為字也明漢劉火德盡而傳於新室也皇帝謙

謙既備固讓十二符應迫著命不可辭

師古曰迫促也著明也

懼

然祇畏葦然閔漢氏之終不可濟

師古曰懼音瞿然自失之意也葦然變

動之貌也瞿音居具反

疊疊在左右之不得從意

師古曰疊疊自勉之意左右助

也言欲助漢室而迫天命不得從其本意也左右音曰佐佑也

為之三夜不御寢三日

不御食延問公侯卿大夫僉曰宜奉如上天威命於是

乃改元定號海內更始新室既定神祇懽喜申以福應

吉瑞累仍

師古曰申重也仍頻也

詩曰宜民宜人受祿于天保右

命之自天申之

師古曰大雅假樂之詩也言有功德宜於衆人者則受天之福祿天乃保安而

佑助之命以邦國也申謂重其意也右讀曰佑

此之謂也五威將奉符命齎印

綬王侯以下及吏官名更者

師古曰更改也

外及匈奴西域徼

外蠻夷皆即授新室印綬因收故漢印綬賜吏爵人二

級民爵人一級女子百戶羊酒蠻夷幣帛各有差大赦

天下五威將乘乾文車

鄭氏曰畫天文象於車也

駕坤六馬

鄭氏曰坤為北

馬六地數

背負鷺鳥之毛服飾甚偉

師古曰鷺鳥雉屬即鷩也今俗呼之山雞非

也驚音麗

每一將各置左右前後中帥凡五帥衣冠車服駕

馬各如其方面色數

師古曰色者東方青南方赤也數者若木數三大數二之類也

將

持節稱太一之使帥持幢稱五帝之使莽策命曰普天

之下迄于四表

師古曰迄亦至也

靡所不至其東出者至玄菟

樂浪高句驪夫餘

師古曰夫餘亦東北夷也樂音洛浪音郎夫音扶

南出者隃

徼外歷益州

師古曰隃字與踰同

貶句町王為侯西出者至西域

盡改其王為侯北出者至匈奴庭授單于印改漢印文

去璽曰章單于欲求故印陳饒椎破之語在匈奴傳單

于大怒而句町西域後卒以此皆畔饒還拜為大將軍

封威德子冬雷

師古曰
古雷字

桐華置五威司命中城四關將

軍司命司上公以下中城主十二城門策命統睦侯陳

崇曰咨爾崇夫不用命者亂之原也大姦猾者賊之本

也鑄偽金錢者妨寶貨之道也驕奢踰制者兇害之端

也漏泄省中及尚書事者機事不密則害成也

師古曰
易上繫

之辭曰君不密則失臣臣不密則失身機事不密則害成故引之

拜爵王庭謝恩私門

者祿去公室政從亡矣凡此六條國之綱紀是用建爾

作司命柔亦不如剛亦不吐不侮鰥寡不畏強圉

師古曰引

詩大雅美仲山甫之辭其義並解於上

帝命帥繇統睦于朝

師古曰帥猶也繇讀與由

同

命說符侯崔發曰重門擊柝以待暴客

師古曰易下繫之辭也擊

柝謂擊木以守夜也暴客謂姦暴之人來為寇害者也柝音他各反○宋祁曰柝一作柝

女作五威

中城將軍

師古曰女讀曰汝其下並同○宋祁曰中或作闕

中德既成天下說

符

師古曰說音悅

命明威侯王級曰繞雷之固南當荆楚

服虔曰隘

險之道師古曰謂之繞雷者言四面塞阨其道屈曲谿谷之水回繞而雷也其處即今商州界七盤十二繞是

也雷音力救反

女作五威前關將軍振武奮衛明威于前命尉

睦侯王嘉曰羊頭之阨北當燕趙

師古曰羊頭山名在上黨壺關縣

女

作五威後關將軍壺口捶扼尉睦于後

師古曰壺口亦山名也捶扼謂

據險阨而捶擊也捶音之藥反

命堂威侯王竒曰有龜之險東當鄭衛

師古曰有肴山也龜音莫善反皆在陝縣之東

女作五威左關將軍函谷

批難掌威于左

師古曰批謂糾開之也函谷故關今在桃林縣界批音步結反○宋祁曰掌當

作堂蕭該曰案晉灼音義作批難字林云擊也父迷反廣雅曰批擊也釋名曰批兩指相裨助共擊也

命

懷羗子王福曰汧隴之阻西當戎狄

師古曰汧扶風汧縣有吳山汧水之

阻隴謂隴阨也汧隴相連汧音苦堅反阨音丁禮反

女作五威右關將軍成固據

守懷羗于右又遣諫大夫五十人分鑄錢於郡國是歲

長安狂女子碧呼道中

師古曰碧者女子名也呼叫也音火故反

曰高皇帝

大怒趣歸我國不者九月必殺汝

師古曰趣讀曰促

莽收捕殺

之治者掌寇大夫陳成自免去官

師古曰狂妄之人職在掌寇故云治者

真定劉都等謀舉兵發覺皆誅真定常山大雨雹

師古曰雨

音于具反

二年二月赦天下五威將帥七十二人還奏事漢

諸侯王為公者悉上璽綬為民無違命者封將為子帥

為男初設六莞之令

師古曰莞亦管字也管主也韋昭曰謂禁地面猶開一路以專之如

莞者命縣官酤酒賣鹽鐵器鑄錢諸采取名山大澤衆物

者稅之又令市官收賤賣貴賒貸予民收息百月三淳如

曰出百錢與民用月收其息三錢也師古曰貸音吐戴反義和置酒士郡一人乘傳

督酒利師古曰督察視之傳音張戀反禁民不得挾弩鎧徙西海匈奴

單于求故璽莽不與遂寇邊郡殺略吏民十一月立國

將軍建奏西域將欽上言師古曰但欽也九月辛巳戌己校尉

史陳良終帶共賊殺校尉刀護師古曰刀音貂○宋祁曰刀並注改作刀劫

略吏士自稱廢漢大將軍亡入匈奴又今月癸酉不知

何一男子遮臣建車前自稱漢氏劉子輿成帝下妻子

也

師古曰下妻猶言小妻也

劉氏當復

師古曰復音扶福反

趣空宮

師古曰趣讀曰促

收繫男子即常安姓武字仲皆逆天違命

○宋祁曰男或作妻字一

本無違字

大逆無道請論仲及陳良等親屬當坐者奏可漢

氏高皇帝比著戒云罷吏卒為賓食

師古曰比頻也言高帝頻戒云勿使

吏卒守漢廟欲為寄食之賓於王氏廟中誠欲承天心全子孫也其宗廟不

當在常安城中及諸劉為諸侯者當與漢俱廢陛下至

仁久未定前故安衆侯劉崇徐鄉侯劉快陵鄉侯劉曾

師古曰楚
思王子

扶恩侯劉貴等

師古曰不知誰子孫

更聚衆謀反

師古曰更

音工

衡反今狂狡之虜或妄自稱亡漢將軍或稱成帝子子

與至犯夷滅連未止者此聖恩不蚤絕其萌芽故也臣

愚以為漢高皇帝為新室賓享食明堂成帝異姓之兄

弟平帝壻也皆不宜復入其廟元帝與皇太后為體

師古

曰夫婦一體也

聖恩所隆禮亦宜之臣請漢氏諸廟在京師者

皆罷諸劉為諸侯者以戶多少就五等之差其為吏者

皆罷待除於家

師古曰罷黜其職各使退歸而言在家待遷除

上當天心稱高

皇帝神靈

師古曰稱音尺孕反

塞狂狡之萌莽曰可嘉新公國師

以符命為予四輔明德侯劉冀率禮侯劉嘉等凡三十

二人皆知天命或獻天符或貢昌言

師古曰昌善也

或捕告反

虜厥功茂焉諸劉與三十二人同宗共祖者勿罷賜姓

曰王唯國師以女配莽子故不賜姓改定安太后號曰

黃皇室主絕之於漢也冬十二月雷更名匈奴單于曰

降奴服于莽曰降奴服于知

師古曰知者莽改單于之名也本名囊知牙斯

威

侮五行

師古曰引夏書甘誓之文

背畔四條

師古曰四條莽所與作制者事在匈奴傳

侵

犯西域延及邊垂為元元害臯當夷滅命遣立國將軍
孫建等凡十二將十道並出共行皇天之威罰于知之

身

師古曰共讀曰恭

惟知先祖故呼韓邪單于稽侯

柵師古曰柵音刪

又音先安反韋昭曰柵惡健犬也

累世忠孝保塞守徼不忍以一知之

罪滅稽侯柵之世今分匈奴國土人民以為十五立稽
侯柵子孫十五人為單于遣中郎將蘭苞戴綬馳之塞
下召拜當為單于者諸匈奴人當坐虜知之法者皆赦
除之遣五威將軍苗訢虎賁將軍王況出五原厭難將

軍陳欽震狄將軍王巡出雲中

師古曰厭音一涉反

振武將軍王

嘉平狄將軍王萌出代郡相威將軍李參鎮遠將軍李

翁出西河

師古曰琴音所林反韋昭曰琴音疏禁反字林曰琴支條琴麗也

誅貉將軍

陽俊討穢將軍嚴尤出漁陽奮武將軍王駿定胡將軍

王晏出張掖及偏裨以下百八十人募天下囚徒丁男

甲卒三十萬人轉衆郡委輸五大夫衣裘兵器糧食長

吏送自負海江淮至北邊使者馳傳督趣以軍興法從

事

師古曰傳音張戀反趣音促○劉奉世曰五大夫不可曉疑衍

天下騷動先至者屯

邊郡湏畢具乃同時出莽以錢幣訖不行

師古曰訖竟也復下

書曰民以食為命以貨為資是以八政以食為首寶貨

皆重則小用不給皆輕則儻載煩費

師古曰儻送也一曰儻也音子就反

輕重大小各有差品則用便而民樂於是造寶貨五品

語在食貨志百姓不從但行小大錢二品而已盜鑄錢

者不可禁廼重其法一家鑄錢五家坐之沒入為奴婢

吏民出入持布錢以副符傳

師古曰舊法行者持符傳即不稽留今更令持布錢

與符相副乃得過也傳音張戀反其下亦同

不持者厨傳勿舍關津苛留

師古

曰厨行道飲食處傳置驛之舍也苛問也音何

公卿皆持以入宮殿門欲以重

而行之是時爭為符命封侯其不為者相戲曰獨無天

帝除書乎司命陳崇白莽曰此開姦臣作福之路而亂

天命宜絕其原莽亦厭之遂使尚書大夫趙並驗治非

五威將率所班皆下獄初甄豐劉歆王舜為莽腹心倡

導在位

師古曰倡音赤上反○蕭該曰所班舊作所辨案韋昭曰辨布也音班或作班

褒揚功

德安漢宰衡之號及封莽母兩子兄子皆豐等所共謀

而豐舜歆亦受其賜並富貴矣非復欲令莽居攝也宋○

祁曰或無貴字

居攝之萌出於泉陵侯劉慶前輝光謝囂長安

令田終術莽羽翼已成意欲稱攝豐等承順其意莽輒復封舜歆兩子及豐孫豐等爵位已盛心意既滿又實

畏漢宗室天下豪桀而疏遠欲進者並作符命莽遂據

以即真舜歆內懼而已豐素剛強莽覺其不說

師古曰說讀曰

悅故徙大阿右拂大司空豐託符命文為更始將軍

師古

曰拂讀曰弼

與賣餅兒王盛同列豐父子默默時子尋為侍

中京兆大尹茂德侯即作符命言新室當分陝立二伯

師古曰分陝者欲依周公召公故事自陝以東周公主之自陝以西召公主之陝即今陝州是其地也伯長也

陝音式再反

以豐為右伯太傅平晏為左伯如周召故事莽

即從之拜豐為右伯當述職西出未行尋復作符命言

故漢氏平帝后黃皇室主為尋之妻莽以詐立心疑大

臣怨謗欲震威以懼下因是發怒曰黃皇室主天下母

此何謂也收捕尋尋亡豐自殺尋隨方士入華山歲餘

捕得辭連國師公歆子侍中東通靈將五司大夫

○劉奉世

曰東通靈將五司大夫亦疑其謠非史本文

隆威侯棻棻弟右曹長水校尉

伐虜侯泳大司空邑弟左關將軍堂威侯奇及歆門人

侍中騎都尉丁隆等牽引公卿黨親列侯以下死者數

百人尋手理有天子字莽解其臂入視之曰此一天子

也

○宋祁曰天或作大

或曰一六子也六者戮也明尋父子當戮

死也迺流桀于幽州放尋于三危殛隆于羽山

師古曰效舜之

罰共工等也殛誅也音居力反

皆驛車載其屍傳致云莽為人侈口顰

頤

師古曰侈大也顰短也頤頤也顰其月反頤胡感反

露眼赤精大聲而嘶

師古曰嘶

聲破也音先吳反

長七尺五寸好厚履高冠以毳裝衣

師古曰毛之強

曲者曰甕以裝楮木中令其張起反膺高視瞰臨左右

也甕音力之反字或作縻音義同

師古曰瞰謂遠視也音曲濫反是時有用方技待詔黃門者或問以莽

形貌待詔曰莽所謂鵠目虎吻豺狼之聲者也故能食

人亦當為人所食問者告之莽誅滅待詔而封告者後

常翳雲母屏面

師古曰屏面即便面蓋扇之類也解在張敞傳

非親近莫得見

也是歲以初睦侯姚恂為寧始將軍三年莽曰百官改

更職事分移律令儀法未及悉定且因漢律令儀法以

從事令公卿大夫諸侯二千石舉吏民有德行通政事

能言語明文學者各一人詣王路四門

○宋祁曰路字下有門字遣

尚書大夫趙並使勞北邊還言五原北假膏壤殖穀師古

曰北假地名也膏壤言其土肥美也殖生也

異時常置田官乃以並為田禾

將軍發戍卒屯田北假以助軍糧是時諸將在邊須大

衆集

師古曰須待也

吏士放縱而內郡愁於徵發民棄城郭流

亡為盜賊并州平州尤甚莽令七公六卿號皆兼稱將

軍遣著武將軍遂並等填名都

師古曰遂音錄填音竹刃反此下亦同

中

郎將繡衣執法各五十五人分填緣邊大郡督大姦猾

擅弄兵者皆便為姦於外撓亂州郡

師古曰撓音火高反其字從手

貨

賂為市侵漁百姓莽下書曰虜知罪當夷滅故遣猛將

分十二部將同時出一舉而決絕之矣內置司命軍正

外設軍監十有二人誠欲以司不奉命令軍人咸正也

今則不然各為權執恐獨良民

師古曰獨以威力脅之也音呼葛反

妄封

人頸得錢者去

如淳曰權臣妄以法枉良人為僮僕封其頸以別之也得顧錢乃去封

毒

蠶竝作農民離散

師古曰蠶音呼各反

司監若此可謂稱不

師古曰稱

音尺自今以來敢犯此者輒捕繫以名聞然猶放縱自

若而藺苞戴級到塞下招誘單于弟咸咸子登入塞脅
拜咸為孝單于賜黃金千斤錦繡甚多遣去將登至長
安拜為順單于留邸太師王舜自莽篡位後病悸寢劇
死

師古曰心動曰悸寢漸也悸音葵季友○宋祁曰悸舊作喘

莽曰昔齊太公以淑

德累世為周氏太師蓋予之所監也

師古曰監謂視見也

其以舜

子延襲父爵為安新公延弟褒新侯匡為太師將軍永
為新室輔為太子置師友各四人秩以大夫以故大司
徒馬宮為師疑故少府宗伯鳳為傅丞博士袁聖為阿

輔京兆尹王嘉為保拂

師古曰拂讀曰弼

是為四師故尚書令

唐林為胥附博士李充為犇走

師古曰犇古奔字

諫大夫趙襄

為先後中郎將廉丹為禦侮是為四友又置師友祭酒及侍中諫議六經祭酒各一人凡九祭酒秩上卿琅邪左咸為講春秋潁川滿昌為講詩長安國由為講易平陽唐昌為講書沛郡陳咸為講禮崔發為講樂祭酒遣謁者持安車印綬即拜楚國龔勝為太子師友祭酒勝不應徵不食而死寧始將軍姚恂免侍中崇祿侯孔永

為寧始將軍是歲池陽縣有小人景長尺餘或乘車馬

或步行操持萬物小大各相稱

師古曰車馬及物皆稱其人之形

三日

止瀕河郡蝗生

師古曰謂緣河南北諸郡瀕音頻又音賓

河決魏郡泛清河

以東數郡先是莽恐河決為元城冢墓害及決東去元

城不憂水故遂不堤塞四年二月赦天下夏赤氣出東

南竟天厭難將軍陳歆言捕虜生口虜犯邊者皆孝單

于咸子角所為莽怒斬其子登于長安以視諸蠻夷

師古

曰視音曰示

大司馬甄邯死寧始將軍孔永為大司馬侍中

大贅侯輔為寧始將軍莽每當出輒先搜索城中名曰

橫搜

師古曰索音山各反橫音胡孟反

是月橫搜五日莽至明堂授諸

侯茅土下書曰予以不德襲于聖祖為萬國主思安黎

元在于建侯分州正域以美風俗

○宋祁曰分字下當有九字

追監

前代爰綱爰紀惟在堯典十有二州衛有五服

師古曰並詳於

上詩國十五布徧九州

師古曰謂周南召南衛王鄭齊魏唐秦陳鄧曹幽魯商凡十五

國也一曰周南召南邶鄘衛王鄭齊魏唐秦陳鄧曹幽是為十五國布音普胡反○宋祁曰國字當作曰殷

頌有奄有九有之言

師古曰商頌玄鳥之詩美湯有功德故能覆有九州

禹貢之

九州無并幽周禮司馬則無徐梁

○宋祁曰淳化本無無并二字

帝王

相改各有云為或昭其事或大其本厥義著明其務一
矣昔周二后受命故有東都西都之居予之受命蓋亦
如之其以洛陽為新室東都常安為新室西都邦畿連
體各有采任州從禹貢為九爵從周氏有五諸侯之員
千有八百附城之數亦如之以俟有功諸公一同有衆
萬戶土方百里侯伯一國衆戶五千土方七十里子男
一則衆戶二千有五百土方五十里附城大者食邑九

成衆戶九百土方三十里自九以下降殺以兩

師古曰兩兩而

降也殺音所例反

至於一成

如淳曰十里為成

五差備具合當一則今

已受茅土者公十四人侯九十三人伯二十一人子百

七十一人男四百九十七人凡七百九十六人附城千

五百一十一人九族之女為任者八十三人及漢氏女

孫中山承禮君遵德君脩義君更以為任十有一公九

卿十二大夫二十四元士定諸國邑采之處使侍中講

理大夫孔秉等與州部衆郡曉知地理圖籍者共校治

于壽成朱鳥堂予數與羣公祭酒上卿親聽視咸已通

矣夫褒德賞功所以顯仁賢也九族和睦所以褒親親

也予永惟匪解思稽前人

師古曰解讀曰解稽考也

將章黜陟以明

好惡安元元焉以圖簿未定未授國邑且令受奉都內

月錢數千

師古曰奉音扶用反

諸侯皆困乏至有庸作者中郎區

博諫莽曰

師古曰區姓也音一侯反

井田雖聖王法其廢久矣周道

既衰而民不從秦知順民之心可以獲大利也故滅廬

井而置阡陌遂王諸夏訖今海內未厭其敝今欲違民

心追復千載絕迹

師古曰復音扶目反

雖堯舜復起而無百年之

漸弗能行也天下初定萬民新附誠未可施行莽知民

怨廼下書曰諸名食王田皆得賣之勿拘以法犯私買

賣庶人者且一切勿治初五威將帥出改句町王以為

侯王邯怨怒不附

師古曰邯句町王之名也音下甘反

莽諷牂柯大尹周

歆詐殺邯邯弟承起兵攻殺歆先是莽發高句驪兵當

伐胡不欲行郡強迫之皆亡出塞因犯法為寇遼西大

尹田譚追擊之為所殺州郡歸咎於高句驪侯騶嚴尤

奏言貉人犯法不從騶起正有它心宜令州郡且尉安

之

師古曰假令騶有惡心亦當且慰安

今猥被以大罪恐其遂畔

師古曰猥多也

厚也被加也

音皮義反

夫餘之屬必有和者

師古曰和應也音胡臥反

匈奴未

克夫餘滅貉復起此大憂也莽不尉安滅貉遂反詔尤擊之尤誘高句驪侯騶至而斬焉傳首長安莽大說下

書曰廼者命遣猛將共行天罰

師古曰共讀曰恭

誅滅虜知分

為十二部或斷其右臂或斬其左腋或潰其胃腹或紬

其兩脅

師古曰紬音與抽同

今年刑在東方

張晏曰是歲在壬申刑在東方

誅貉

之部先縱焉捕斬虜騶平定東域虜知殄滅在于漏刻
此乃天地羣神社稷宗廟佑助之福公卿大夫士民同
心將率號虎之力也

師古曰號音火交反

予甚嘉之其更名高句

驪為下句驪布告天下令咸知焉於是貉人愈犯邊東
北與西南夷皆亂云莽志方盛以為四夷不足吞滅專
念稽古之事復下書曰伏念予之皇始祖考虞帝受終
文祖在璿璣玉衡以齊七政遂類于上帝禋于六宗望
秩于山川徧于羣神巡狩五嶽羣后四朝敷奏以言明

試以功

師古曰解並在前

予之受命即真至于建國五年已五

載矣陽九之阨既度百六之會已過歲在壽星填在明

堂倉龍癸酉德在中宮

服虔曰倉龍太歲也張晏曰太歲起於甲寅為龍東方倉癸德

在中宮也晉灼曰壽星角亢也東宮倉龍房心也心為明堂填星所在其國昌莽自謂土也土行主填星癸德在中宮宮又土也

觀晉掌歲龜策告從

孟康曰觀辰星進退掌主也晉灼曰國語晉文

公以卯出酉入過五鹿得土歲在壽星其日戊申莽欲法之以為吉祥正以二月建寅之節東巡狩者取萬物生之始也視晉識太歲所在其以此年二月建寅之節宿度所合卜筮皆吉故法之

東巡狩具禮儀調度

師古曰調音徒鈞反

羣公奏請募吏民人馬

布綿又請內郡國十二買馬發帛四十五萬匹輸常安

前後母相須

師古曰
須待也

至者過半莽下書曰文母太后體

不安其且止待後是歲改十一公號以新為心後又改

心為信五年二月文母皇太后崩葬渭陵與元帝合而

溝絕之

如淳曰葬於司馬
門內作溝絕之

立廟於長安新室世世獻祭

元帝配食坐於牀下莽為太后服喪三年大司馬孔永

乞骸骨賜安車駟馬以特進就朝位同風侯遂並為大

司馬是時長安民聞莽欲都雒陽不肯繕治室宅

師古
曰繕

補也或頗徹之莽曰玄龍石文曰定帝德國雒陽符命著

明敢不欽奉以始建國八年歲經星紀

孟康曰經居也星紀在斗牽牛

問師古曰經踐歷也音直連反

在雒陽之都其謹繕脩常安之都勿令

壞敗敢有犯者輒以名聞請其罪是歲烏孫大小昆彌遣使貢獻大昆彌者中國外孫也其胡婦子為小昆彌而烏孫歸附之莽見匈奴諸邊並侵意欲得烏孫心廼遣使者引小昆彌使置大昆彌使上保成師友祭酒滿昌劾奏使者曰夷狄以中國有禮誼故詘而服從大昆

彌君也今序臣使於君使之上非所以有夷狄也奉使
大不敬莽怒免昌官西域諸國以莽積失恩信焉耆先
畔殺都護但欽十一月彗星出二十餘日不見是歲以
犯挾銅炭者多除其法明年改元曰天鳳天鳳元年正
月赦天下莽曰予以二月建寅之節行巡狩之禮大官
齎糒乾肉內者行張坐臥師古曰糒乾飯也張坐臥謂帷帳茵席也糒音備○宋祁
曰淳化本無內字新所過毋得有所給師古曰言自齎食及帷帳以行
本肉字下去內者行
在路所經過予之東巡必躬載耒每縣則耕以勸東作
不須供費也

師古曰耒耜曲木也音力對反
○宋祁曰耒字下當有耜字
予之南巡必躬載耜每

縣則耨以勸南偽

師古曰耨耜也耨耕去草也耨音奴
豆反耨音火高反偽讀曰訛訛化也

予之西巡必躬載銍每縣則穫以勸西成予之北巡必

躬載拂每縣則粟以勸蓋臧

師古曰拂音佛所以擊治
禾者也今謂之連枷粟謂

治粟畢北巡狩之禮即于土中居雒陽之都焉敢有趨謹

犯法輒以軍法從事

劉德曰趨
謹走呼也

羣公奏言皇帝至孝往

年文母聖體不豫躬親供養衣冠稀解因遭弃羣臣悲

哀顏色未復飲食損少今一歲四巡道路萬里春秋尊

非糒乾肉之所能堪且無巡狩須闋大服以安聖體

師古

曰闋盡也音口決反

臣等盡力養牧兆民奉稱明詔

師古曰稱副也

莽曰

羣公羣牧羣司諸侯庶尹願盡力相帥養牧兆民欲以

稱予繇此敬德

師古曰繇讀與由同

其勗之哉毋食言焉更以天

鳳七年歲在大梁倉龍庚辰行巡狩之禮厥明年歲在

實沈倉龍辛巳即土之中雒陽之都廼遣太傅平晏大

司空王邑之雒陽營相宅兆圖起宗廟社稷郊兆云三

月壬申晦日有食之大赦天下策大司馬遂並曰日食

無光干戈不戢其上大司馬印鞞就侯氏朝位太傅平

晏勿領尚書事省侍中諸曹兼官者以利苗男訢為大

司馬

如淳曰利苗邑名

莽即真尤備大臣抑奪下權朝臣有言

其過失者輒拔擢孔仁趙博費興等以敢擊大臣故見

信任

師古曰費音扶味反

擇名官而居之公卿入宮吏有常數太

傅平晏從吏過例掖門僕射苛問不遜

師古曰僕射苛問平晏其言不

遜戊曹士收繫僕射

應劭曰莽自以土行故使太傅置戊曹士士掾也蘇林曰士者曹掾

屬公府諸曹次第之名也師古曰應說是○蕭該曰戊字案春秋說曰土戊也五行書曰戊己屬土王莽自以

土行音懋莽大怒使執法發車騎數百圍太傅府捕士即時

死大司空士夜過奉常亭亭長苛之告以官名亭長醉

曰寧有符傳耶師古曰傳音張戀反士以馬箠擊亭長師古曰箠策也音止

樂反亭長斬士亡郡縣逐之家上書師古曰亭長家上書自治莽曰亭

長奉公勿逐大司空邑斥士以謝後○劉攽曰前云斬士後云斥士則非斬也

疑是斫字國將哀章頗不清莽為選置和叔師古曰特為置此官敕曰

非但保國將閨門當保親屬在西州者諸公皆輕賤而

章尤甚四月隕霜殺中木師古曰中古草字海瀕尤甚師古曰遶海之

地也瀕音頻又音賓

六月黃霧四塞七月大風拔樹飛北闕直城

門屋瓦

師古曰北闕直城門瓦皆飛也直城門長安城門名也鮮在成紀

雨電殺牛羊

莽以周官王制之文置卒正連率大尹職如太守屬令

屬長職如都尉置州牧部監二十五人見禮如三公監

位上大夫各主五郡公氏作牧侯氏卒正伯氏連率子

氏屬令男氏屬長皆世其官其無爵者為尹分長安城

旁六鄉置帥各一人分三輔為六尉郡

師古曰三輔黃圖云渭城安陵

以西北至枸邑義渠十縣屬京尉大夫府居故長安寺高陵以北十縣屬師尉大夫府居故廷尉府新豐以東

至湖十縣屬翊尉大夫府居城東霸陵杜陵東至藍田
西至武功郁夷十縣屬光尉大夫府居城南茂陵槐里
以西至汧十縣屬扶尉大夫府居城西長陵池陽
以北至雲陽祿祔十縣屬列尉大夫府居城北河東

河內弘農河南潁川南陽為六隊郡

師古曰隊音遂
劉奉世曰河南當

為滎陽莽所分以為六隊之一也下
文自有河南大尹更為保忠信卿

置大夫職如太守

屬正職如都尉更名河南大尹曰保忠信卿益河南屬

縣滿三十置六郊州長各一人

○劉奉世曰當
為六郊衍州字

人主五

縣及它官名悉改大郡至分為五郡縣以亭為名者三

百六十以應符命文也緣邊又置竟尉以男為之

師古
曰竟

讀曰境

諸侯國閒田為黜陟增減云

師古曰閒音間以擬有功封賜有罪黜奪

也莽下書曰常安西都曰六鄉衆縣曰六尉義陽東都

曰六州

○劉奉世曰州當為郡

衆縣曰六隊粟米之內曰內郡

師古

曰禹貢去王城四百里納粟五百里納米皆在甸服之內

其外曰近郡有鄣徼者曰

邊郡合百二十有五郡九州之內縣二千二百有三公

作甸侯是為惟城諸在侯服是為惟寧在采任諸侯是

為惟翰

師古曰采采服也任男服也

在賓服是為惟屏

師古曰賓服即古衛服也

取諸侯賓服以為名

在揆文教奮武衛是為惟垣在九州之外是

為惟藩

師古曰凡此惟城以下取詩大雅板之篇云价人惟藩大師惟垣大邦惟屏大宗惟翰懷德惟

寧宗子惟城以為名號也鮮在諸侯王年表

各以其方為稱總為萬國焉其

後歲復變更一郡至五易名而還復其故吏民不能紀

每下詔書輒繫其故名曰制詔陳留大尹太尉其以益

歲以南付新平

蘇林曰陳留園縣莽改曰益歲

新平故淮陽以雍丘以

東付陳定陳定故梁郡以封丘以東付治亭治亭故東

郡以陳留以西付祈隧祈隧故滎陽

○劉奉世曰此祈隧即莽六隊之一

也莽蓋分河南之滎陽置郡

陳留已無復有郡矣大尹太尉皆詣行

在所其號令變易皆此類也令天下小學戊子代甲子

為六旬首冠以戊子為元日

師古曰冠音工
喚反元善也

昏以戊寅

之旬為忌日

師古曰昏
謂娶妻也

百姓多不從者匈奴單于知死

弟咸立為單于求和親莽遣使者厚賂之詐許還其侍

子登因購求陳良終帶等單于即執良等付使者檻車

詣長安莽燔燒良等於城北令吏民會觀之緣邊大饑

人相食諫大夫如普行邊兵

師古曰行
音下更反

還言軍士久屯

塞苦邊郡無以相贍今單于新和宜因是罷兵校尉韓

威進曰以新室之威而吞胡虜無異口中蚤虱臣願得
勇敢之士五千人不齎斗糧饑食虜肉渴飲其血可以
橫行莽壯其言以威為將軍然采普言徵還諸將在邊
者免陳欽等十八人又罷四關填都尉諸屯兵會匈奴
使還單于知侍子登前誅死發兵寇邊莽復發軍屯於
是邊民流入內郡為人奴婢廼禁吏民敢挾邊民者弃
市益州蠻夷殺大尹程隆三邊盡反遣平蠻將軍馮茂
將兵擊之寧始將軍侯輔免講易祭酒戴參為寧始將

軍二年二月置酒王路堂公卿大夫皆佐酒

師古曰助行酒

大

赦天下是時日中見星大司馬苗訢左遷司命以延德

侯陳茂為大司馬訢言黃龍墮死黃山宮中百姓犇走

往觀者有萬數莽惡之

師古曰莽自謂黃德故有此妖

捕繫問語所從

起不能得單于咸既和親求其子登屍莽欲遣使送致

恐咸怨恨害使者廼收前言當誅侍子者故將軍陳欽

以他臯繫獄欽曰是欲以我為說於匈奴也

師古曰說解說也託

言以其前建議誅侍子今故殺之

遂自殺莽選儒生能頗對者

師古曰頗與專

同專對謂應對
無方能專其事
濟南王咸為大使五威將琅邪伏黯等

為帥使送登屍敕令掘單于知墓棘鞭其屍又令匈奴

却塞於漠北責單于馬萬匹牛三萬頭羊十萬頭及稍

所略邊民生口在者皆還之
○劉放曰稍所略非辭
當云所鈔略傳寫誤爾莽

好為大言如此咸到單于庭陳莽威德責單于背畔之

辜應敵從橫單于不能詘遂致命而還之
○劉奉世入
之字衍

塞咸病死封其子為伯伏黯等皆為子莽意以為制定

則天下自平故銳思於地里制禮作樂講合六經之說

公卿旦入暮出議論連年不決不暇省獄訟冤結民之

急務縣宰缺者數年守兼

師古曰不拜正官權令人守兼

一切貪殘日

甚

○宋祁曰甚下當有是時二字

中郎將繡衣執法在郡國者並乘權

執傳相舉奏

○宋祁曰傳疑作傳

又十一公士分布勸農桑班時

令案諸童冠蓋相望交錯道路召會吏民逮捕證左郡

縣賦歛遞相賂賂白黑紛然

師古曰白黑謂清濁也紛然亂意也言清濁不分也

守闕告訴者多莽自見前顓權以得漢政故務自撫衆

事

師古曰撫與擊同其字從手

有司受成苟免

師古曰莽事事自決成熟乃以付吏吏苟

免罪責

諸寶物名帑藏錢穀官皆宦者領之

師古曰帑音他莽反

又音奴

吏民上封事書宦官左右開發尚書不得知其畏

備臣下如此又好變改制度政令煩多當奉行者輒質

問乃以從事

師古曰質正也

前後相乘憤眊不深

師古曰乘積也登也憤眊

不明也深散也微也憤音工內反眊音莫報反

莽常御燈火至明猶不能勝尚

書因是為姦寢事上書待報者連年不得去拘繫郡縣

者逢赦而後出衛卒不交代三歲矣穀常貴邊兵二十

餘萬人仰衣食縣官愁苦

師古曰仰音牛向反

五原代郡尤被其

毒起為盜賊數千人為輩轉入旁郡莽遣捕盜將軍孔

仁將兵與郡縣合擊歲餘迺定邊郡亦略將盡

師古曰言其逃

亡結為盜賊在者少也

邯鄲以北大雨霧水出深者數丈

○劉攽曰霧字

疑非流殺數千人立國將軍孫建死司命趙闕為立國將

軍寧始將軍戴參歸故官南城將軍廉丹為寧始將軍

三年二月乙酉地震大雨雪

師古曰雨音于具反

關東尤甚深者

一丈竹栢或枯大司空王邑上書言視事八年功業不

效司空之職尤獨廢頓至迺有地震之變願乞骸骨莽

曰夫地有動有震震者有害動者不害春秋記地震易

繫坤動動靜辟脅萬物生焉

師古曰辟讀曰闢開也脅收歛也易上繫之辭曰夫

坤其動也闢其靜也翕是以廣生焉故莽引之也翕脅之聲相近義則同災異之變各有云

為天地動威以戒予躬公何辜焉而乞骸骨非所以助

予者也使諸吏散騎司祿大衛脩寧男遵諭予意焉五

月莽下吏祿制度曰予遭陽九之阨百六之會國用不

足民人騷動自公卿以下一月之祿十縷布二匹

孟康曰縷

八十縷也師古曰縷音子公反韋昭曰四秉曰莒十莒曰縷十縷為禾四百秉也

或帛一匹予

每念之未嘗不戚焉今阮會已度府帑雖未能充略頗
稍給其以六月朔庚寅始賦吏祿皆如制度四輔公卿
大夫士下至輿僚凡十五等僚祿一歲六十六斛稍以
差增上至四輔而為萬斛云莽又曰普天之下莫非王
土率土之濱莫非王臣

師古曰莽引小雅北山之詩也

蓋以天下養焉

周禮膳羞百有二十品令諸侯各食其同國則

師古曰謂公食

同侯伯食國子男食則也

辟任附城食其邑

師古曰辟君也任公主也辟音壁任音壬○宋

祁曰如淳曰辟公主也任宗室女也蕭該按爾雅曰皇王后辟君也

公卿大夫元士食其

采

師古曰謂因官職而食地也

多少之差咸有條品歲豐穰則充其

禮

師古曰穰音人掌反

有災害則有所損與百姓同憂喜也其用

上計時通計天下幸無災害者太官膳羞備其品矣即

有災害以什率多少而損膳焉

○宋祁曰什下當有計字

東嶽太師

立國將軍保東方三州一部二十五郡南嶽太傅前將

軍保南方二州一部二十五郡西嶽國師寧始將軍保

西方一州二部二十五郡北嶽國將衛將軍保北方二

州一部二十五郡大司馬保納卿言卿仕卿作卿京尉

扶尉兆隊右隊中部左洎前七部

服虔曰大司馬保此官皆如郡守也晉灼

曰左與前故特七部師古曰洎亦泉字也泉及也隊音遂此下並同

大司徒保樂卿典卿

宗卿秩卿翼尉光尉左隊前隊中部右部有五郡大司

空保予卿虞卿共卿工卿師尉列尉祈隊後隊中部洎

後十郡

師古曰共讀曰供○劉攽曰此文誤但當云大司馬保納言卿作士卿大司徒保典樂卿秩宗

卿大司空保予虞卿共工卿不合分為兩也劉奉世曰其言七部亦當云七郡然共有二十二郡尚未及二十

五郡疑字

及六司六卿皆隨所屬之公保其災害

○劉奉世

當有誤曰莽所六司又已有六卿此當但云司卿即所謂三公司卿曰司允司直司若者也後人不曉又妄加兩六字

耳亦以十率多少而損其祿郎從官中都官吏食祿都

內之委者以大官膳羞備損而為節

師古曰言隨其多少

諸侯辟

任附城羣吏亦各保其災害幾上下同心

師古曰幾讀曰冀

勸

進農業安元元焉莽之制度煩碎如此課計不可理吏

終不得祿各因官職為姦受取賕賂以自共給

師古曰共讀曰

供是月戊辰長平館西岸崩邕涇水不流毀而北行

師古曰

日邕讀

遣大司空王邑行視

師古曰行音下更反

還奏狀羣臣上

壽以為河圖所謂以土填水

師古曰填讀與鎮同

匈奴滅亡之祥

也乃遣并州牧宋弘遊擊都尉任萌等將兵擊匈奴至

邊止屯七月辛酉霸城門災民間所謂青門也

師古曰三輔黃

圖云長安城東出南頭名霸城門俗以其色青名曰青門

戊子晦日有食之大赦天

下復令公卿大夫諸侯二千石舉四行各一人

師古曰依漢光

祿之四科○劉奉世曰四行蓋前已舉德行言語政事文學今復令舉之非光祿四行

大司馬陳

茂以日食免武建伯嚴尤為大司馬

如淳曰莽之伯子男號也

十月

戊辰王路朱鳥門鳴書夜不絕崔發等曰虞帝闢四門

通四聰

師古曰虞書敘舜之德也闢四門明四目達四聰故引之

門鳴者明當脩先

聖之禮招四方之士也於是令羣臣皆賀所舉四行從
朱鳥門入而對策焉平蠻將軍馮茂擊句町士卒疾疫
死者什六七賦歛民財什取五益州虛耗而不克徵還
下獄死更遣寧始將軍廉丹與庸部牧史熊擊句町頗
斬首有勝莽徵丹熊丹熊願益調度必克乃還復大賦
歛就都大尹馮英不肯給上言自越雋遂久仇牛同亭
邪豆之屬反畔以來積且十年

服虔曰遂久縣名也
仇牛等越雋旁夷

郡

縣距擊不已續用馮茂苟施一切之政輒道以南山險

高深茂多毆衆遠居

師古曰毆讀與驅同

費以億計吏士離毒氣

死者什七

師古曰離遭也

今丹熊懼於自詭期會

師古曰詭責也自以為憂

責調發諸郡兵穀復訾民取其十四

師古曰發人訾財十取其四也

空

破梁州功終不遂

師古曰遂成也

宜罷兵屯田

○宋祁曰宜或作一旦者非是

明設購賞莽怒免英官後頗覺寤曰英亦未可厚非復

以英為長沙連率翟義黨王孫慶捕得莽使太醫尚方

與巧屠共剝剝之

師古曰剝剖也音口胡反

量度五藏

師古曰度音徒各反以

竹筴導其脉知所終始云可以治病

師古曰筴竹挺也音廷以知血脉之

原則盡攻療之道也○宋祁曰蕭該音義鄭氏曰筵音平訂之訂筵草也予案字書曰訂評議也音亭字林曰筵維絲管也大丁反是歲遣大使五威將王駿西域都護李崇將

戊己校尉出西域諸國皆郊迎貢獻焉諸國前殺都護

但欽駿欲襲之命佐帥何封戊己校尉郭欽別將

師古曰別

領兵在後也

將焉者詐降伏兵擊駿等皆死欽封後到襲

擊老弱從車師還入塞莽拜欽為填外將軍

師古曰填音竹刃反

封剽胡子

師古曰剽音子小反韋昭曰又作剽音斐

何封為集胡男西域自

此絕

前漢書卷九十九中

前漢書卷九十九中考證

王莽傳中始建國元年○顧炎武曰荀悅漢紀記莽事
自始建國元年以後則云其二年其三年以至其十
五年以別於正統而盡沒其天鳳地皇之號

中傳將孺子下殿○後書注引前書音義中傳宦者也

又置司恭司徒○

臣召南

按此司徒當作司從與聰明

恭一例舊本別本俱誤耳

惟王氏虞帝之後也出自帝嚳劉氏堯之後也出自顓

項○按謂舜出于魯堯出于項莽于是直誣古帝矣

遣五威將王奇等十二人班符命云云○臣召南按五

威將十二人其將一人各有帥五人故下文云五威將帥七十二人還奏事也

并州平州尤甚○胡三省曰此時未有平州漢末公孫度自稱平州牧魏始分幽州置平州平字誤也

前漢書卷九十九中考證

欽定四庫全書

前漢書卷九十九下

漢 蘭 臺 令 史班 固撰

唐正議大夫行秘書少監琅邪縣開國子顏師古注

王莽傳第六十九下

四年五月莽曰保成師友祭酒唐林故諫議祭酒琅邪

紀逡

師古曰逡音千旬反字或從彳其音同耳

孝弟忠恕敬上愛下博通舊

聞德行醇備至於黃髮靡有愆失

師古曰黃髮老稱謂白髮盡落更生黃者

其封林為建德侯遂為封德侯位皆特進見禮如三公

師古曰朝見之禮

賜第一區錢三百萬授几杖焉六月更授諸

侯茅土於明堂曰予制作地理建封五等考之經藝合

之傳記通於義理

○宋祁曰考之合之下各當添於字通字下當添之字

論之思

之至於再三自始建國之元以來九年于茲廼今定矣

予親設文石之平陳菁茅四色之土

師古曰尚書禹貢苞匭菁茅儒者以

為菁菜名也茅三脊茅也而莽此言以菁茅為一物則是謂菁茅為菁茅也土有五色而此云四者中央之土

不以封也菁音精

欽告于岱宗泰社后土先祖先妣以班授之

師古曰欽敬也班布也

各就厥國養牧民人用成功業其在緣邊

若江南非詔所召遣侍于帝城者納言掌貨大夫且調

都內故錢予其祿

師古曰調謂發取之音徒鈞反次下亦同

公歲八十萬侯

伯四十萬子男二十萬然復不能盡得莽好空言慕古

法多封爵人性實遴嗇

師古曰遴讀與吝同

託以地理未定故且

先賦茅土用慰喜封者是歲復明六筭之令每一筭下

為設科條防禁犯者罪至死吏民抵罪者寢衆又一切

調上公以下諸有奴婢者率一口出錢三千六百天下

愈愁盜賊起

○宋祁曰起上當有興字

納言馮常以六筭諫莽大怒

免常官置執法左右刺姦選用能吏侯霸等分督六尉

六隊

師古曰督察也隊音遂

如漢刺史與三公士郡一人從事臨

淮瓜田儀等為盜賊依阻會稽長州

服虔曰姓瓜田名儀師古曰長州即

枚乘所云長州之苑

琅邪女子呂母亦起初呂母子為縣吏為宰

所冤殺

師古曰宰縣令

母散家財以酤酒買兵弩

師古曰酤音姑

陰厚

貧窮少年得百餘人遂攻海曲縣殺其宰以祭子墓引

兵入海其衆浸多後皆萬數莽遣使者即赦盜賊還言

盜賊解輒復合問其故皆曰愁法禁煩苛不得舉手力作所得不足以給貢稅閉門自守又坐鄰伍鑄錢挾銅姦吏因以愁民民窮悉起為盜賊莽大怒免之其或順指言民驕黠當誅及言時運適然且滅不久莽說輒遷之師古曰說讀曰悅是歲八月莽親之南郊鑄作威斗威斗者以五石銅為之李奇曰以五色藥石及銅為之蘇林曰以五色銅鑛治之師古曰李說是也若今作鉤石之為若北斗長二尺五寸欲以厭勝衆兵師古曰厭音一葉反既成令司命負之莽出在前入在御旁鑄斗日大寒百

官人馬有凍死者五年正月朔北軍南門災以大司馬
司允費興為荊州牧見問到部方略興對曰荆揚之民
率依阻山澤以漁采為業

師古曰漁謂捕魚也
采謂采取蔬果之屬

間者國

張六莞稅山澤妨奪民之利連年久旱百姓饑窮故為

盜賊興到部欲令明曉告盜賊歸田里假貸犂牛種食

師古曰貸
音土戴反

闊其租賦

師古曰
闊寬也

幾可以解釋安集

師古曰
幾讀曰

冀

莽怒免興官天下吏以不得奉祿並為姦利郡尹縣

宰家累千金莽下詔曰詳考始建國二年胡虜猾夏以

來諸軍吏及緣邊吏大夫以上為姦利增產致富者收

其家所有財產五分之四以助邊急公府士馳傳天下

考覆貪饕

師古曰傳音張應反饕音吐高反

開吏告其將奴婢告其主

幾以禁姦

師古曰幾讀曰冀

姦愈甚皇孫功崇公宗坐自畫容

貌被服天子衣冠刻印三一曰維祉冠存已夏處南山

臧薄冰

文穎曰祉福祚也冠存已欲襲代也應劭曰夏處南山就陰涼也臧薄冰亦以除暑也二

曰肅聖寶繼

應劭曰莽自謂承聖舜後能肅敬得天寶龜以立宗欲繼其緒三曰德封

昌圖

蘇林曰宗自言以德見封當遂昌熾受天下圖籍

又宗舅呂寬家前徙合

浦私與宗通發覺按驗宗自殺莽曰宗屬為皇孫爵為

上公知寬等叛逆族類而與交通刻銅印三文意甚害

不知厭足窺欲非望春秋之義君親母將將而誅焉

師古

曰春秋公羊傳之辭也以公子牙將為弑逆而誅之故云然也親謂父母也

迷惑失道自取

此辜嗚呼哀哉宗本名會宗以制作去二名今復名會

宗貶厥爵改厥號賜諡為功崇繆伯以諸侯之禮葬于

故同穀城郡

師古曰同者宗所封一同之地

宗姊妨為衛將軍王興夫

人祝詛姑殺婢以絕口事發覺莽使中常侍薨憚責問

妨

師古曰覺音帶又音徒蓋反

并以責興皆自殺事連及司命孔仁

妻亦自殺仁見莽免冠謝莽使尚書劾仁乘乾車駕坤

馬左蒼龍右白虎前朱鳥

○宋祁曰鳥當作雀

後玄武右杖威節

左負威斗號曰赤星非以驕仁廼以尊新室之威命也

仁擅免天文冠大不敬有詔勿劾更易新冠其好怪如

此

師古曰言莽性好為鬼神怪異之事

以直道侯王涉為衛將軍涉者曲

陽侯根子也根成帝世為大司馬薦莽自代莽恩之

師古

曰懷其舊恩也

以為曲陽非令稱

師古曰令善也曲陽之名非善稱也

乃追諡根

曰直道讓公涉嗣其爵是歲赤眉力子都樊崇等

○劉攽曰

力當作刁以饑饉相聚起於琅邪轉鈔掠衆皆萬數遣使者

發郡國兵擊之不能克六年春莽見盜賊多乃令太史

推三萬六千歲歷紀六歲一改元布天下下書曰紫閣

圖曰太一黃帝皆僊上天

師古曰僊古仙字上升也

張樂崑崙崙度山

之上後世聖主得瑞者當張樂秦終南山之上

服虔云長安南

山詩所謂終南故秦地故言秦也

予之不敏奉行未明乃今諭矣復以

寧始將軍為更始將軍以順符命易不云乎日新之謂

盛德生生之謂易

李奇曰易道生諸當生者也師古曰下繫之辭體化合變故曰日新予

其饗哉欲以誑耀百姓銷解盜賊衆皆笑之

○宋祁曰笑當作咲

初獻新樂於明堂太廟羣臣始冠麟韋之弁

李奇曰鹿皮冠或

聞其樂聲曰清厲而哀非興國之聲也是時關東饑旱

數年力子都等黨衆寢多

師古曰寢漸也

更始將軍廉丹擊益

州不能克徵還更遣復位後大司馬護軍郭興庸部牧

李暉擊蠻夷若豆等太傅義叔孫喜清潔江湖之盜

賊而匈奴寇邊甚莽乃大募天下丁男及死罪囚吏民

奴名曰豬突豨勇以為銳卒一切稅天下吏民訾三十

取一縑帛皆輸長安令公卿以下至郡縣黃綬皆保養

軍馬

師古曰保者言不許其有死失

多少各以秩為差又博募有奇技

術可以攻匈奴者將待以不次之位言便宜者以萬數

或言能度水不用舟楫

師古曰楫所以刺舟也音集其字從木

連馬接騎

濟百萬師或言不持斗糧服食藥物三軍不饑或言能

飛一日千里可窺匈奴莽輒試之取大鳥翮為兩翼

師古

曰翮本曰翮音胡隔反

頭與身皆著毛通引環紐飛數百步墮莽

知其不可用苟欲獲其名皆拜為理軍賜以車馬待發

初匈奴右骨都侯須卜當其妻王昭君女也嘗內附莽

遣昭君兄子和親侯王歆誘呼當至塞下脅將詣長安

強立以為須卜善于後安公

師古曰善于者匈奴之號也後安公者中國之爵兩

加之始欲誘迎當大司馬嚴尤諫曰當在匈奴右部兵不

侵邊單于動靜輒語中國此方面之大助也于今迎當

置長安橐街一胡人耳

師古曰橐街蠻夷館所在也解在陳湯傳橐音工早反不

如在匈奴有益莽不聽既得當欲遣尤與廉丹擊匈奴

皆賜姓徵氏號二徵將軍當誅單于興而立當代之師

古師

曰興者時見為單于之名

出車城西橫厰未發尤素有智略非莽攻

伐四夷數諫不從著古名將樂毅白起不用之意及言

邊事凡三篇奏以風諫莽

師古曰風讀曰諷

及當出廷議尤固

言匈奴可且以為後先憂山東盜賊莽大怒乃策尤曰

視事四年蠻夷猾夏不能遏絕寇賊姦宄不能殄滅不

畏天威不用詔命兒恨自臧持必不移

師古曰兒古貌字也兒恨言其

恨戾見於容貌也臧善也自以懷執異心非沮軍議師為善而固持其所見不可移易懷執異心非沮軍議古師

曰沮壞也音材汝反未忍致于理其上大司馬武建伯印鞞師古曰鞞

者印組歸故郡以降符伯董忠為大司馬翼平連率田況

奏郡縣訾民不實師古曰舉百姓訾財不以實數莽復三十稅一以況

忠言憂國進爵為伯賜錢二百萬衆庶皆詈之○宋祁曰詈當

作罵青徐民多弃鄉里流亡老弱死道路壯者入賊中夙

夜連率韓博上言有奇士長丈大十圍來至臣府曰欲

奮擊胡虜自謂巨毋霸出於蓬萊東南五城西北昭如

海瀕師古曰昭如海名也瀕涯也音頻又音賓輶車不能載三馬不能勝即

日以大車四馬建虎旗載霸詣闕霸臥則枕鼓以鐵著

食

○宋祁曰南本云臥則枕數尺鐵非是

此皇天所以輔新室也願陛下

作大甲高車賁育之衣遣大將一人與虎賁百人迎之

於道京師門戶不容者開高大之以視百蠻

師古曰視讀曰示

鎮安天下博意欲以風莽

晉灼曰諷言母得篡盜而霸

莽聞惡之留

霸在所新豐

師古曰在所謂其見到之處

更其姓曰巨母氏謂因文

母太后而霸王符也

師古曰莽字巨君若言文母出此人使我致霸王

徵博下

獄以非所宜言弃市明年改元曰地皇從三萬六千歲

歷號也地皇元年正月乙未赦天下下書曰方出軍行

師敢有趨謹犯法者輒論斬毋須時

師古曰趨謹謂趨走而謹謹也須待

也盡歲止

師古曰至此歲盡而止

於是春夏斬人都市百姓震懼

道路以目二月壬申日正黑莽惡之下書曰廼者日中

見昧陰薄陽黑氣為變

○宋祁曰蕭該音義曰昧字林云日旁作未言昧爽旦明也日

闇昧云昧升勺後星也音芒太反予案易曰日中見昧非音昧也當音芒太反

百姓莫不驚怪

兆域大將軍王匡

○劉奉世曰兆域二字無理當是北城字衍大字前有南城將軍此王匡

又別一王匡也遣吏考問上變事者欲蔽上之明是以適見于

天

師古曰適音謫謫責也音徒危反見音胡電反

以正于理塞大異焉莽見四

方盜賊多復欲厭之

師古曰厭音一葉反

又下書曰予之皇初祖

考黃帝定天下將兵為上將軍建華蓋立斗獻

師古曰獻音義

謂斗魁及杓末如勺之形也

內設大將外置大司馬五人大將軍二

十五人偏將軍百二十五人裨將軍千二百五十人校

尉萬二千五百人司馬三萬七千五百人侯十一萬二

千五百人當百二十二萬五千人

晉灼曰當亦官名也師古曰當百官名百

非其數

士吏四十五萬人士千三百五十萬人

晉灼曰自五大司馬

至此皆以五乘之也師古曰晉說非應協於易弧矢之

利以威天下

師古曰易下繫辭曰弦木為弧剡木為矢弧矢之利以威天下言所立將率以合此

意木弓

予受符命之文稽前人將條備焉

師古曰稽考也考法於前

人於是置前後左右中大司馬之位賜諸州牧號為大

將軍郡卒正連帥大尹為偏將軍屬令長裨將軍

○宋祁曰

卒字當作率

縣宰為校尉乘傳使者經歷郡國日且十輩

古師

曰傳音張戀反次下亦同

倉無見穀

師古曰見謂見在也

以給傳車馬不能足

賦取道中車馬

師古曰於道中行者即執取之以取辦充事也○劉攽曰以給當屬上句

於民七月大風毀王路堂復下書曰乃壬午晡時有烈

風雷雨發屋折木之變

師古曰烈風暴烈之風

予甚弁焉予甚栗

焉予甚恐焉

師古曰弁疾也一曰言驚懼也

伏念一句迷廼解矣

取

師古曰先言烈風雷雨後言迷廼解矣蓋言約于大麓烈風雷雨不迷以為言也

昔符命文立

安為新遷王

服虔曰安莽第三子也遷音仙莽改汝南新蔡曰新遷師古曰遷猶僊耳不勞假借

音臨國雒陽為統義陽王是時予在攝假謙不敢當而

以為公其後金匱文至議者皆曰臨國雒陽為統謂據

土中為新室統也宜為皇太子自此後臨久病雖瘳不

平朝見孥茵興行

服虔曰有疾以執茵興之行也晉灼曰漢儀注皇后婕妤乘輦餘者以茵

四人舉以行豈今之板輿而鋪茵乎師古曰晉說非也此直謂坐茵褥之上而令四人對舉茵之四角輿而行

何謂板輿乎

見王路堂者張於西廂及後閣更衣中

李奇曰張帳也

晉灼曰更衣中謂朝賀易衣服處室屋名也

又以皇后被疾臨且去本就舍

妃妾在東永巷

師古曰言臨侍疾故去其本所居而士來就此止息是以妃妾在東永巷也

午烈風毀王路西廂及後閣更衣中室昭寧堂池東南

榆樹大十圍東僵擊東閣閣即東永巷之西垣也皆破

折瓦壞發屋拔木予甚驚焉又候官奏月犯心前星厥

有占予甚憂之伏念紫閣圖文太一黃帝皆得瑞以僊

後世褒主當登終南山

李奇曰褒主大主也

所謂新遷王者乃太

一新遷之後也

服虔曰太一黃帝欲令安追繼其後也

統義陽王乃用五

統以禮義登陽上遷之後也臨有兄而稱太子名不正

宣尼公曰名不正則言不順至於刑罰不中民無錯手

足

師古曰論語載孔子對子路之言錯安置也音千故反莽追謚孔子為褒成宣尼公

惟即位以

來陰陽未和風雨不時數遇枯旱蝗螟為災穀稼鮮耗

百姓苦饑

師古曰鮮少也耗虛也鮮音先踐反耗音火到反

蠻夷猾夏寇賊姦

究人民正營無所措手足

師古曰正營惶恐不安之意也正音征

深惟厥

咎在名不正焉其立安為新遷王臨為統義陽王幾以

保全二子

師古曰幾讀曰冀

子孫千億外攘四夷內安中國焉

是月杜陵便殿乘輿虎文衣廢臧在室匣中者

師古曰匣匱也

狎出自樹立外堂上

師古曰樹豎也

良久乃委地吏卒見者以

聞莽惡之下書曰寶黃廝赤

服虔曰以黃為寶自用其行氣也廝赤廝役賤者皆

衣赤賤漢行也

其令郎從官皆衣絳望氣為數者多言有土功

象莽又見四方盜賊多欲視為自安能建萬世之基者

師古曰乃下書曰予受命遭陽九之厄百六之會府帑

視音示空虛百姓匱乏宗廟未修且祫祭於明堂太廟夙夜永

念非敢寧息深惟吉昌莫良於今年予乃卜波水之北

郎池之南惟玉食劉德曰長安南也晉灼曰黃圖波郎

非也黃圖有西波池郎池皆在石城南上林中予又卜

玉食謂龜為玉兆之文而墨食也波音彼皮反

金水之南明堂之西亦惟玉食予將親築焉於是遂營

長安城南師古曰蓋所謂金提封百頃九月甲申莽立

載行視師古曰立載謂立而親舉築三下司徒王尋大

司空王邑持節及侍中常侍執法杜林等數十人將作

師古曰將領築作之人

崔發張邛說莽曰德盛者文縟

師古曰文禮文也縟

繁也音辱

宜崇其制度宣視海內

師古曰視讀曰示

且令萬世之後

無以復加也莽乃博徵天下工匠諸圖畫以望法度算

及吏民以義入錢穀助作者駱驛道路

師古曰駱驛言不絕壞徹

城西苑中建章承光包陽大臺儲元宮及平樂當路陽

祿館凡十餘所

師古曰自建章以下至陽祿皆上林苑中館○劉攽曰建章與宮同名疑當是

字取其材瓦以起九廟是月大雨六十餘日令民入米

六百斛為郎其郎吏增秩賜爵至附城九廟一曰黃帝
太初祖廟二曰帝虞始祖昭廟三曰陳胡王統祖穆廟
四曰齊敬王世祖昭廟五曰濟北愍王王祖穆廟凡五
廟不墮云

師古曰墮毀也音火規反

六曰濟南伯王尊禰昭廟七曰

元城孺王尊禰穆廟八曰陽平頃王戚禰昭廟九曰新

都顯王戚禰穆廟殿皆重屋太初祖廟東西南北各四

十丈高十七丈餘廟半之為銅薄櫨

師古曰薄櫨柱上枅即今所謂楮也

盧音飾以金銀琱文師古曰琱字與彫同窮極百工之巧帶高增

下

師古曰本因高地而建立之其旁下者更增築○宋祁曰帶當作本

功費數百鉅萬卒

徒死者萬數鉅鹿男子馬適求等謀舉燕趙兵以誅莽

姓

師古曰馬適也求名也

大司空士王丹發覺以聞莽遣三公大夫

逮治黨與

師古曰逮逮捕之也已解於上

連及郡國豪傑數千人皆誅

死封丹為輔國侯自莽為不順時令百姓怨恨莽猶安

之又下書曰惟設此壹切之法以來常安六鄉巨邑之

都枹鼓稀鳴盜賊衰少

師古曰枹大也枹所以擊鼓者也音孚其字從木

百姓

安土歲以有年此乃立權之力也今胡虜未滅誅蠻獫

未絕焚江湖海澤麻沸盜賊未盡破殄

師古曰麻沸言如亂麻而沸涌

又興奉宗廟社稷之大作民衆動搖今復壹切行此令
盡二年止之以全元元救愚姦是歲罷大小錢更行貨
布長二寸五分廣一寸直貨錢二十五貨錢徑一寸重
五銖枚直一兩品竝行敢盜鑄錢及偏行布貨伍人知
不發舉皆沒入為官奴婢

師古曰伍人同伍之人若今伍保者也○宋祁曰淳化本

景本入字下有官字

太傅平晏死以予虞唐尊為太傅尊曰國虛

民貧咎在奢泰乃身短衣小裋乘北馬柴車

師古曰柴車即棧車

藉橐瓦器

師古曰藉橐去蒲弱也瓦器以瓦為食器

又以歷遺公卿

師古曰以瓦器

盛食遺公卿也

出見男女不異路者尊自下車以象刑赭幡汗

染其衣

師古曰赭幡以赭汁漬巾幡

莽聞而說之

師古曰說讀曰悅

下詔申

敕公卿思與厥齊

師古曰令與尊同此操行也論語稱孔子曰見賢思齊故莽云然

封

尊為平化侯是時南郡張霸江夏羊牧王匡等起雲杜

綠林號曰下江兵

晉灼曰本起江夏雲杜縣後分西

皆萬餘人武功中水鄉民三舍塾為池

師古曰塾陷也音丁念反二

年正月以州牧位三公刺舉怠解

師古曰懈讀曰懈

更置牧監

副秩元士冠法冠行事如漢刺史是月莽妻死謚曰孝
睦皇后葬渭陵長壽園西令永侍文母名陵曰億年初
莽妻以莽數殺其子涕泣失明莽令太子臨居中養焉
莽妻旁侍者原碧莽幸之後臨亦通焉恐事泄謀共殺
莽臨妻愔國師公女師古曰愔音一尋反能為星語臨宮中且有
白衣會臨喜以為所謀且成後貶為統義陽王出在外
第愈憂恐會莽妻病困臨予書曰上於子孫至嚴前長
孫中孫年俱三十而死師古曰中讀曰仲今臣臨復適三十誠

恐一旦不保中室則不知死命所在

李奇曰中室臨之母也晉灼曰長樂

宮中殿也師古曰二說皆非也中室室中也臨自言欲於室中自保全不可得耳

莽候妻疾見

其書大怒疑臨有惡意不令得會喪既葬收原碧等考

問具服姦謀殺狀莽欲秘之使殺案事使者司命從事

埋獄中家不知所在賜臨藥臨不肯飲自刺死使侍中

票騎將軍同說侯林賜魂衣璽韞

師古曰說讀曰悅

策書曰符

命文立臨為統義陽王此言新室即位三萬六千歲後

為臨之後者乃當龍陽而起前過聽議者以臨為太子

有烈風之變輒順符命立為統義陽王在此之前自此
之後不作信順弗蒙厥佑天年隕命嗚呼哀哉迹行賜
謚謚曰繆王又詔國師公臨本不知星事從愔起愔亦
自殺是月新遷王安病死初莽為侯就國時幸侍者增
秩懷能開明懷能生男興增秩生男匡女畢開明生女
捷皆留新都國以其不明故也師古曰言侍者或與外人私通所生子女不可
分明及安疾甚莽自病無子為安作奏使上言興等母
雖微賤屬猶皇子不可以棄章視羣公師古曰視讀曰示以所上之章

徧示皆曰安友于兄弟師古曰友愛也宜及春夏加封

爵於是以王車遣使者迎興等封興為功修公匡為功

建公畢為睦修任捷為睦逮任孫公明公壽病死旬月

四喪焉莽壞漢孝武孝昭廟分葬子孫其中魏成大尹

李焉與卜者王況謀況謂焉曰新室即位以來民田奴

婢不得賣買數改錢貨徵發煩數軍旅騷動四夷竝侵

百姓怨恨盜賊竝起漢家當復興君姓李李音徵徵火

也師古曰徵音竹里反當為漢輔因為焉作讖書言文帝發忿居

地下趣軍北告匈奴南告越人

師古曰趣讀曰促

江中劉信執

敵報怨復續古先四年當發軍江湖有盜自稱樊王姓

為劉氏萬人成行

師古曰行音胡郎反

不受赦令欲動秦雒陽十

一年當相攻太白揚光歲星入東井其號當行

師古曰號謂號

也又言莽大臣吉凶各有日期會合十餘萬言焉令吏

寫其書吏亡告之莽遣使者即捕焉獄治皆死三輔盜

賊麻起

師古曰言起者如亂麻也

乃置捕盜都尉官令執法謁者追

擊長安中建鳴鼓攻賊幡而使使者隨其後遣太師義仲

景尚更始將軍護軍王黨將兵擊青徐國師和仲曹放

助郭興擊句町轉天下穀幣詣西河五原朔方漁陽每

一郡以百萬數欲以擊匈奴秋隕霜殺菽關東大饑蝗

民犯鑄錢伍人相坐沒入為官奴婢其男子檻車兒女

子步以鐵鎖琅當其頸傳詣鍾官以十萬數師古曰琅

鍾官主鑄錢之官也到者易其夫婦師古曰改相配匹不依其舊也愁苦死者什

六七孫熹景尚曹放等擊賊不能克軍師放縱百姓重

困師古曰重音直用反莽以王況讖言荆楚當興李氏為輔欲厭

之

師古曰厭音一葉反

廼拜侍中掌牧大夫李琴為大將軍揚州

牧賜名聖

師古曰改其舊名以聖代識琴音所林反

使將兵奮擊上谷儲夏

自請願說瓜田儀

服虔曰儲夏人姓也○劉奉世曰注脫一名字

莽以為中郎

使出儀

師古曰說之令自出

儀文降未出而死

師古曰上文書言降而身未出

莽

求其尸葬之為起冢祠室謚曰瓜寧殤男幾以招來其

餘

師古曰幾讀曰冀

然無肯降者閏月丙辰大赦天下天下大

服民私服在詔書前亦釋除

張晏曰莽妻本以此歲死天下大服也私服自喪其

親之郎陽成脩獻符命言繼立民母又曰黃帝以百二

十女致神僊莽於是遣中散大夫謁者各四十五人分

行天下

師古曰行音下更反

博采鄉里所高有淑女者上名莽夢

長樂宮銅人五枚起立莽惡之念銅人銘有皇帝初兼

天下之文即使尚方工鑄滅所夢銅人膺文

師古曰鑄鑿也音子

全反又感漢高廟神靈

師古曰謂夢見譴責

遣虎賁武士入高廟拔

劍四面提擊

師古曰提擲也音徒計反

斧壞戶牖

師古曰以斧斫壞之

桃湯赭

鞭鞭灑屋壁

師古曰桃湯灑之也赭赤也

令輕車校尉居其中

又令中軍北壘居高寢

師古曰徙北軍壘之兵也

或言黃

帝時建華蓋以登僊莽乃造華蓋九重高八丈一尺金

瑤羽葆

師古曰瑤讀曰爪謂蓋弓頭為爪形

載以祕機四輪車

服虔曰蓋高八丈其

扛皆有屈膝可上下屈伸也師古曰言潛為機關不使外見故曰祕機也駕六馬力士三百

人黃衣幘車上人擊鼓輓者皆呼登仙莽出令在前百

官竊言此似輜車非僊物也

師古曰輜車載喪車音而是歲南郡秦

豐衆且萬人平原女子遲昭平能說經博以八投

服虔曰博

奕經以八箭投之

亦聚數千人在河阻中莽召問羣臣禽賊方

略皆曰此天囚行尸命在漏刻故左將軍公孫祿徵來

與議

師古曰與讀曰豫

祿曰太史令宗宣典星歷候氣變以凶

為吉亂天文誤朝廷太傅平化侯飾虛偽以媮名位賊

夫人之子

師古曰論語稱子路使子羔為費宰孔子曰

賊害也故祿引此而言○宋祁曰侯下當有唐尊二字

國師嘉信公顛倒五經毀

師法令學士疑惑明學男張邕地理侯孫陽造井田使

民棄土業義和魯匡設六筦以窮工商說符侯崔發阿

諛取容令下情不上通宜誅此數子以慰天下又言匈

奴不可攻當與和親臣恐新室憂不在匈奴而在封域

之中也莽怒使虎賁扶祿出然頗采其言左遷魯匡為

五原卒正以百姓怨非故六筦非匡所獨造莽厭衆意

而出之

師古曰厭滿也音一艷反

初四方皆以饑寒窮愁起為盜賊

稍稍羣聚常思歲孰得歸鄉里衆雖萬數曾稱巨人從

事三老祭酒

師古曰宣讀曰言不為大號

不敢略有城邑轉掠求食

日闕而已

師古曰闕盡也隨而盡也闕音空穴反

諸長吏牧守皆自亂鬪

中兵而死

師古曰中傷也

賊非敢欲殺之也而莽終不諭其故

師古曰不曉此意也

是歲大司馬士按章豫州

師古曰有上章相告者就而按治之

為賊所獲賊送付縣士還上書具言狀莽大怒下獄以
為誣罔因下書責七公曰夫吏者理也宣德明恩以牧
養民仁之道也抑强督姦捕誅盜賊義之節也

師古曰
督謂察

也視今則不然盜發不輒得至成羣黨遮略乘傳宰士

師古

曰傳音士得脫者又妄自言我責數賊何故為是

師古
曰數

音所賊曰以貧窮故耳賊護出我今俗人議者率多若

具反

此惟貧困饑寒犯法為非大者羣盜小者偷穴不過二

科

師古曰穴謂
穿牆為盜也

今乃結謀連黨以千百數是逆亂之大

者豈饑寒之謂邪七公其嚴敕卿大夫卒正連率庶尹
謹牧養善民急捕殄盜賊有不同心并力疾惡黜賊而
妄曰饑寒所為輒捕繫請其罪於是羣下愈恐莫敢言
賊情者亦不得擅發兵賊由是遂不制唯翼平連率田
況素果敢發民年十八以上四萬餘人授以庫兵與刻
石為約赤糜聞之不敢入界師古曰糜眉也以朱塗眉故曰赤眉古字通用況
自劾奏莽讓況師古曰讓責也未賜虎符而擅發兵此弄兵也
厥臯之興師古曰擅發之罪與之軍興同科也以況自詭必禽滅賊故且

勿治

師古曰詭責也自以為憂責

後況自請出界擊賊所嚮皆破莽

以璽書令況領青徐二州牧事況上言盜賊始發其原

甚微非部吏伍人所能禽也咎在長吏不為意縣欺其

郡郡欺朝廷實百言十實千言百朝廷忽略不輒督責

遂至延曼連州

師古曰延音弋戰反曼與蔓同

乃遣將率多發使者傳

相監趣

師古曰趣讀曰促

郡縣力事上官應塞詰對

師古曰力勤也塞當

也共酒食具資用以救斷斬

師古曰交懼斬死之刑也共讀曰供○宋祁曰交懼

斷死罪之刑也

不給復憂盜賊治官事

師古曰給暇也

將率又不能躬

率吏士戰則為賊所破吏氣寢傷徒費百姓

師古曰寢漸也

幸蒙赦令賊欲解散或反遮擊恐入山谷轉相告語故

郡縣降賊皆更驚駭恐見詐滅因饑饉易動旬日之間

更十餘萬人此盜賊所以多之故也今雒陽以東米石

二千竊見詔書欲遣太師更始將軍二人爪牙重臣多

從人衆道上空竭少則亡以威視遠方

師古曰讀曰示

宜急

選牧尹以下明其賞罰收合離鄉小國無城郭者徙其

老弱置大城中積臧穀食并力固守賊來攻城則不能

下所過無食執不得羣聚如此招之必降擊之則滅今
空復多出將率郡縣苦之反甚於賊宜盡徵還乘傳諸
使者以休息郡縣委任臣況以二州盜賊必平定之莽
畏惡況陰為發代遣使者賜況璽書使者至見況因令
代監其兵況隨使者西到拜為師尉大夫況去齊地遂
敗三年正月九廟蓋構成納神主莽謁見大駕乘六馬
以五采毛為龍文衣著角長三尺師古曰以華蓋車元被馬上也
戎十乘在前因賜治廟者司徒大司空錢各千萬侍中

中常侍以下皆封封都匠仇延為邯淡里附城

師古曰都匠大

匠也邯音胡敢反淡音大敢反豐盛之意

二月霸橋災數千人以水沃救不

滅莽惡之下書曰夫三皇象春五帝象夏三王象秋五

伯象冬皇王德運也伯者繼空續乏以成歷數故其道

駁

師古曰伯讀曰霸

惟常安御道多以所近為名廼二月癸巳

之夜甲午之辰火燒霸橋從東方西行至甲午夕橋盡

火滅大司空行視考問或云寒民舍居橋下

師古曰舍止宿也

疑以火自燎為此災也

師古曰燎謂炙令腴也

其明旦即乙未立

春之日也予以神明聖祖黃虞遺統受命至于地皇四年為十五年正以三年終冬絕滅霸駁之橋欲以興成新室統壹長存之道也又戒此橋空東方之道今東方歲荒民饑道路不通東岳太師亟科條師古曰亟急也開東方諸倉賑貸窮乏以施仁道其更名霸館為長存館霸橋為長存橋是月赤眉殺太師義仲景尚關東人相食四月遣太師王匡更始將軍廉丹東師古曰東謂東出也祖都門外師古曰祖道送匡丹都門外天大雨霑衣上長老歎曰是謂泣軍莽

曰惟陽九之阨與害氣會究于去年枯旱霜蝗饑饉薦

臻

師古曰薦讀曰荐荐仍也

百姓困乏流離道路於春尤甚予甚悼

之今使東岳太師特進褒新侯開東方諸倉賑貸窮乏

太師公所不過道分遣大夫謁者並開諸倉以全元元

太師公因與廉丹大使五威司命位右大司馬更始將

軍平均侯之兗州填撫所掌

師古曰之往也填音竹刃反

及青徐故

不軌盜賊未盡解散後復屯聚者皆清潔之期於安兆

黎矣

師古曰黎庶也

太師更始合將銳士十餘萬人所過放縱

東方為之語曰寧逢赤眉不逢太師太師尚可更始殺

我卒如田況之言莽又多遣大夫謁者分教民煮草木

為酪酪不可食重為煩費

師古曰重音直用反

莽下書曰惟民困

乏雖溥開諸倉以賑贍之猶恐未足其且開天下山澤

之防諸能采取山澤之物而順月令者其恣聽之勿令

出稅至地皇三十年如故是王光上戊之六年也

曰孟康

土也莽所
作歷名

如令豪吏猾民辜而擢之小民弗蒙非予意

也

師古曰辜擢謂獨專其利而令他人犯者得罪辜也

易不云乎損上益下民說

无疆

師古曰益卦彖辭也言損上益下則人皆歡悅無窮竟

書云言之不從是謂

不艾

師古曰洪範之言艾讀曰久久治也

咨虘羣公可不憂哉

師古曰咨者嘆息之

言是時下江兵盛新市朱鮪平林陳牧等皆復聚衆攻

擊鄉聚莽遣司命大將軍孔仁部豫州納言大將軍嚴

尤秩宗大將軍陳茂擊荊州各從吏士百餘人乘舡從

渭入河

○宋祁曰越本土作七舡當作船

至華陰廼出乘傳到部募士

尤謂茂曰遣將不與兵符必先請而後動是猶紕韓盧

而責之獲也

師古曰紕繫也韓盧古韓國之名犬也黑色曰盧

夏蝗從東方來

蜚救天

師古曰蜚古飛字

至長安入未央宮緣殿閣莽發吏民

設購賞捕擊莽以天下穀貴欲厭之

師古曰厭音一葉反

為大倉

置衛交戟名曰政始掖門流民入關者數十萬人廼置

養贍官稟食之

師古曰稟給也食讀曰飮

使者監領與小吏共盜其

稟饑死者十七八先是莽使中黃門王業領長安市買

賤取於民民甚患之業以省費為功賜爵附城莽聞城

中饑饉以問業業曰皆流民也乃市所賣梁飴肉羹持

入視莽

師古曰視讀曰示

曰居民食咸如此莽信之冬無鹽索

盧恢等舉兵反城

師古曰索盧姓也恢名也反城據城以反也一曰反音幡今語賊猶曰幡

城索音先各反

廉丹王匡攻拔之斬首萬餘級莽遣中郎將奉

璽書勞丹匡進爵為公封吏士有功者十餘人赤眉別

校董憲等衆數萬人在梁郡王匡欲進擊之廉丹以為

新拔城罷勞

師古曰罷讀曰疲

當且休士養威匡不聽引兵獨

進丹隨之合戰成昌

師古曰成昌地名也

兵敗匡走丹使吏持其

印敕符節付匡曰小兒可走吾不可遂止戰死校尉汝

雲王隆等二十餘人別鬪聞之皆曰廉公已死吾誰為

生馳犇賊皆戰死

師古曰犇古奔字也

莽傷之下書曰惟公多擁

選士精兵衆郡駿馬倉穀帑藏皆得自調

師古曰謂發取也音徒鈞

反忽於詔策離其威節騎馬呵譟

師古曰忽謂怠忘也譟羣呼也音先到反

為狂乃所害烏呼哀哉賜諡曰果公國將哀章謂莽曰

皇祖考黃帝之時中黃直為將破殺蚩尤今臣居中黃

直之位願平山東莽遣章馳東與太師匡并力又遣大

將軍陽浚守敖倉司徒王尋將十餘萬屯雒陽填南宮

師古曰填音竹刃反

大司馬董忠養士習射中軍北壘大司空王

邑蕪三公之職司徒尋初發長安宿霸昌廐

師古曰霸昌觀之廐

也三輔黃圖曰在城外也

亡其黃鉞尋士房揚素狂直廼哭曰此經

所謂喪其齊斧者也

應劭曰齊利也亡其利斧言無以復斷斬也師古曰此易巽卦上九

爻

辭自劾去莽擊殺揚四方盜賊徃徃數萬人攻城邑殺

二千石以下太師王匡等戰數不利莽知天下潰畔事

窮計迫廼議遣風俗大夫司國憲等分行天下

師古曰行音下

更除井田奴婢山澤六筭之禁即位以來詔令不便於

民者皆收還之待見未發會世祖與兄齊武王伯升宛

人李通等

師古曰世祖謂光武皇帝

帥舂陵子弟數千人招致新市

平林朱鮪陳牧等合攻拔棘陽是時嚴尤陳茂破下江

兵成丹王常等數千人別走入南陽界十一月有星孛

于張東南行五日不見莽數召問太史令宗宣諸術數

家皆繆對言天文安善羣賊且滅莽差以自安四年正

月漢兵得下江王常等以為助兵擊前隊大夫甄阜屬

正梁丘賜皆斬之殺其衆數萬人初京師聞青徐賊衆

數十萬人訖無文號旌旗表識

師古曰文謂文章號謂大位號也一曰號謂號

令也識讀與幟同音式志反

咸怪異之好事者竊言此豈如古三皇

無文書號謚邪

師古曰欲其事成故云然也

莽亦心怪以問羣臣羣

臣莫對唯嚴尤曰此不足怪也自黃帝湯武行師必待

部曲旌旗號令今此無有者直饑寒羣盜犬羊相聚不

知為之耳莽大說

師古曰說讀曰悅

羣臣盡服及後漢兵劉伯

升起皆稱將軍攻城略地既殺甄阜移書稱說莽聞之

憂懼漢兵乘勝遂圍宛城初世祖族兄聖公先和平林

兵中三月辛巳朔平林新市下江兵將王常朱鮪等共

立聖公為帝改年為更始元年拜置百官莽聞之愈恐

欲外視自安

師古曰視讀曰示

廼染其須髮進所徵天下淑女

杜陵史氏女為皇后聘黃金三萬斤車馬奴婢雜帛珍

寶以巨萬計莽親迎於前殿兩階間成同牢之禮于上

西堂備和嬪美御和人三位視公嬪人九視卿美人二

十七視大夫御人八十一視元士凡百二十人皆佩印

韞執弓韞

師古曰禮記月令仲春之月玄鳥至之日以太牢祠于高禘天子親往后妃率九嬪御乃以

禮天子所御帶以弓韞授以弓矢于高禘之前韞弓乃衣也帶之者求男子之祥也故莽依放之焉韞音獨封

皇后父諶為和平侯拜為寧始將軍諶子二人皆侍中

是日大風發屋折木羣臣上壽曰廼庚子雨水灑道辛

丑清靚無塵

師古曰靚即靜字也

其夕穀風迅疾從東北來

師古曰穀

風即谷風

辛丑巽之宮日也巽為風為順后誼明母道得溫

和慈惠之化也易曰受茲介福于其王母

師古曰晉卦六二爻也介

大也王母君母

禮曰承天之慶萬福無疆

師古曰禮之祝詞

諸欲依廢

漢火劉皆沃灌雪除殄滅無餘雜矣百穀豐茂庶草蕃

殖

師古曰蕃滋也殖生也

元元驩喜兆民賴福天下幸甚莽日與

方士涿郡昭君等於後宮考驗方術縱淫樂焉大赦天下然猶曰故漢氏春陵侯羣子劉伯升與其族人婚姻黨與妄流言惑衆悖畔天命乃手害更始將軍廩丹前隊大夫甄阜屬正梁丘賜及北狄胡虜逆興洎南越虜

若豆孟遷不用此書

師古曰與匈奴單于名也洎及也若豆孟遷蠻楚之名也言伯升已

下孟遷以上不在赦令之限也

有能捕得此人者皆封為上公食邑萬

戶賜寶貨五十萬又詔太師王匡國將哀章司命孔仁兖州牧壽良卒正王閔揚州牧李聖亟進所部州郡兵

師古曰

凡三十萬衆迫措青徐盜賊

師古曰措讀與笮同音莊客反下亦

放此納言將軍嚴尤秩宗將軍陳茂車騎將軍王巡

○宋祁曰

車騎監本作車馬劉奉世曰車馬將軍非官名字之誤也尤茂前云大將軍此云將軍未知孰誤然其它多如

者此左隊大夫王吳亟進所部州郡兵凡十萬衆迫措前

隊醜虜明告以生活丹青之信

師古曰生活謂來降者不殺之也丹青之信言

明著也

復迷惑不解散皆并力合擊殄滅之矣大司空隆

新公宗室戚屬前以虎牙將軍東指則反虜破壞西擊

則逆賊靡碎

師古曰靡散也音武皮反

此廼新室威寶之臣也如黠

賊不解散將遣大司空將百萬之師征伐剽絕之矣

師古

曰剽截也音子小反

遣七公幹士隗囂等七十二人分下赦令曉

諭云囂等既出因逃亡矣四月世祖與王常等別攻潁

川下昆陽鄧定陵

師古曰三縣之名也鄧音一扇反

莽聞之愈恐遣大

司空王邑馳傳之雒陽

師古曰傳音張戀反

與司徒王尋發衆郡

兵百萬號曰虎牙五威兵平定山東得顓封爵政決於

邑除用徵諸明兵法六十三家術者各持圖書受器械

備軍吏傾府庫以遣邑多齎珍寶猛獸欲視饒富用怖

山東

師古曰視
讀曰示

邑至雒陽州郡各選精兵牧守自將定

會者四十二萬人餘在道不絕車甲士馬之盛自古出

師未嘗有也六月邑與司徒尋發雒陽欲至宛道出潁

川過昆陽昆陽時已降漢漢兵守之嚴尤陳茂與二公

會二公縱兵圍昆陽嚴尤曰稱尊號者在宛下宜亟進

師古曰
亟急也彼破諸城自定矣邑曰百萬之師所過當滅今

屠此城喋血而進

師古曰
喋音牒

前歌後舞顧不快邪遂圍城

數十重城中請降不許嚴尤又曰歸師勿遏圍城為之

闕

師古曰此兵法之言也過遮也闕不合也

可如兵法使得逸出以怖宛下

邑又不聽會世祖悉發鄧定陵兵數千人來救昆陽尋

邑易之

師古曰輕易之也易音亦豉反

自將萬餘人行陳

師古曰巡行軍陳也行音

下更反更敕諸營皆按部毋得動獨迎與漢兵戰不利大軍

不敢擅相救漢兵乘勝殺尋昆陽中兵出竝戰邑走軍

亂大風蜚瓦

師古曰蜚古飛字

雨如注水大衆崩壞號譟

師古曰譟

音火虎豹股栗

師古曰言戰懼甚

士卒犇走各還歸其郡邑獨

與所將長安勇敢數千人還雒陽關中聞之震恐盜賊

竝起又聞漢兵言莽鴆殺孝平帝莽廼會公卿以下於

王路堂開所為平帝請命金縢之策泣以視羣臣

師古曰視

讀曰

命明學男張邯稱說其德及符命事因曰易言伏

戎于莽升其高陵三歲不興

師古曰同人卦九三爻辭也莽平草也言伏兵戎於

草莽之中升高陵而望不敢前進至于三歲不能起也

莽皇帝之名升謂劉伯升

高陵謂高陵侯子翟義也言劉升翟義為伏戎之兵於

新皇帝世猶殄滅不興也羣臣皆稱萬歲又令東方檻

車傳送數人言劉伯升等皆行大戮民知其詐也先是

衛將軍王涉素養道士西門君惠君惠好天文讖記為

涉言星孛掃宮室劉氏當復興國師公姓名是也涉信

其言以語大司馬董忠數俱至國師殿中廬道語星宿

師古曰廬者宿止之處道謂說之也國師不應後涉特往對歆涕泣言誠

欲與公共安宗族師古曰誠實也○宋祁曰族字或作姓柰何不信涉也

歆因為言天文人事東方必成涉曰新都哀侯小被病

功顯君素嗜酒師古曰嗜讀曰嗜疑帝本非我家子也如淳曰言莽母

洛薄嗜酒淫逸得莽耳非王氏子也設此詐欲以自別不受誅董公主中軍精兵涉領

宮衛伊休侯主殿中如同心合謀共劫持帝東降南陽
天子可以全宗族不者俱夷滅矣伊休侯者歆長子也
為侍中五官中郎將莽素愛之歆怨莽殺其三子又畏
大禍至遂與涉忠謀欲發歆曰當待太白星出廼可忠
以司中大贅起武侯孫伋亦主兵復與伋謀伋歸家顏
色變不能食妻怪問之語其狀妻以告弟雲陽陳邯邯
欲告之七月伋與邯俱告莽遣使者分召忠等時忠方
講兵都肄

師古曰肄習也大習
兵也肄音亦二反

護軍王咸謂忠謀久不

發恐漏泄不如遂斬使者勒兵入忠不聽遂與歆涉會

省戶下莽令覺憚責問皆服中黃門各拔刃將忠等送

廬忠拔劍欲自刎侍中王望傳言大司馬反黃門持劍

共格殺之省中相驚傳勒兵至郎署皆拔刃張弓更始

將軍史譔行諸署師古曰行音下更反○劉奉世曰告

郎吏曰大司馬有狂病發已誅皆令弛兵師古曰弛放也莽欲

以厭凶師古曰厭當也音一葉反使虎賁以斬馬劍挫忠師古曰挫讀曰剉音

千卧反盛以竹器傳曰反虜出下書赦大司馬官屬吏士

為忠所誣誤謀反未發覺者收忠宗族以醇醢毒藥尺

白刃叢棘并一坎而埋之劉歆王涉皆自殺莽以二人

骨肉舊臣惡其內潰

師古曰王涉骨肉也劉歆舊臣

故隱其誅伊休侯

疊又以素謹歆訖不告

師古曰訖猶竟也歆竟不以所謀告之

但免侍中

中郎將更為中散大夫後日殿中鉤盾土山僊人掌旁

有白頭公青衣

鄭氏曰僊人掌擎承露盤也

以郎吏見者私謂之國師

公衍功侯喜素善卦莽使筮之曰憂兵火莽曰小兒安

得此左道是廼予之皇祖叔父子僑欲來迎我也莽軍

師外破大臣內畔左右亡所信不能復遠念郡國欲諄

邑與計議

師古曰諄古呼字

崔發曰邑素小心今失大衆而徵

恐其執節引決宜有以大慰其意於是莽遣發馳傳諭

邑

師古曰謂諭告之傳音張應反

我年老無適子

師古曰適讀曰嫡

欲傳邑以

天下敕亡得謝見勿復道邑到以為大司馬大長秋張

邯為大司徒崔發為大司空司中壽容苗訢為國師同

說侯林為衛將軍莽憂懣不能食

師古曰懣音滿又音悶

亶飲酒

啗鰕魚

師古曰亶音但下亦類此鰕海魚也音電

讀軍書倦因馮几寐不復

就枕矣

師古曰馮讀曰憑○宋祁曰枕字當作次

性好時日小數及事迫急

亶為厭勝遣使壞渭陵延陵園門眾愚曰毋使民復思

也又以墨洿色其周垣

師古曰洿染之變其舊色也洿音一故反

號將至曰

歲宿申水為助將軍右庚刻木校尉前丙耀金都尉又

曰執大斧伐枯木流大水滅發火如此屬不可勝記秋

太白星流入太微燭地如月光成紀隗崔兄弟共劫大

尹李育

師古曰成紀隴西之縣

以兄子隗囂為大將軍攻殺雍州

牧陳慶安定卒正王旬并其眾移書郡縣數莽罪惡萬

於桀紂是月析人鄧瞋于匡起兵南鄉百餘人

師古曰析南陽

之縣南鄉析縣之鄉名析音先歷反時析宰將兵數千屯鄆亭備武關

師古

曰鄆音亮反瞋匡謂宰曰劉帝已立君何不知命也宰請降

盡得其衆瞋自稱輔漢左將軍匡右將軍拔析丹水攻

武關都尉朱萌降進攻右隊大夫宋綱殺之西拔湖

師古

曰湖弘農之縣也本屬京兆

莽愈憂不知所出崔發言周禮及春秋

左氏國有大災則哭以厭之

師古曰周禮春官之屬女巫氏之職曰凡邦之大災

歌哭而請哭者所以告哀也春秋左氏傳宣十二年楚子圍鄭旬有七日鄭人卜行成不吉卜臨于太宮且巷

出車吉國人大臨守陴者皆哭故發引之以為言也厭音一葉反

故易稱先號咷而後

笑

師古曰同人九五爻辭號咷哭也咷音逃

宜呼嗟告天以求救莽自知敗

廼率羣臣至南郊陳其符命本末仰天曰皇天既命授

臣莽何不殄滅衆賊即令臣莽非是願下雷霆誅臣莽

因搏心大哭氣盡伏而叩頭又作告天策自陳功勞千

餘言諸生小民會旦夕哭為設殮粥

師古曰殮古殮字音干安反

甚

悲哀及能誦策文者除以為郎至五千餘人薨惲將領

之莽拜將軍九人皆以虎為號號曰九虎將北軍精兵

數萬人東內其妻子宮中以為質時省中黃金萬斤者
為一匱尚有六十匱黃門鉤盾臧府中尚方處處各有
數匱長樂御府中御府及都內平準帑臧錢帛珠玉財
物甚衆師古曰御府有令丞少府之屬官也掌珍物中御府者皇后之府臧也平準令丞屬大司農亦珍貨所在也莽愈愛之賜九虎士人四千錢衆重怨無鬪意

九虎至華陰回谿距臨北從河南至山于匡持數千弩

乘堆挑戰鄧曄將二萬餘人從閩鄉南山東街作姑師古

曰閩讀與聞同作姑邪道破其一部北出九虎後擊之
所由也韋昭曰閩音旻

六虎敗走史熊王況詣闕歸死莽使使責死者安在皆

自殺其四虎亡

師古曰六人敗走二人詣闕自殺四人亡

三虎郭欽陳鵬成

重收散卒保京師倉

師古曰九人之中六人敗走三人保倉也京師倉在華陰灌北渭口

也鵬音暉

鄧暠開武關迎漢丞相司直李松將二千餘人至

湖與暠等共攻京師倉未下暠以弘農掾王憲為校尉

將數百人北度渭入左馮翊界降城略地李松遣偏將

軍韓臣等徑西至新豐與莽波水將軍戰波水走韓臣

等追奔遂至長門宮王憲北至頻陽所過迎降

師古曰所至之

處人皆來迎而降附也

大姓櫟陽申瑒下邳王大皆率衆隨憲屬

縣棧嚴春

師古曰屬縣三輔諸縣也棧屬右扶風棧讀與邠同其人姓嚴名春

茂陵董喜

藍田王孟槐里汝臣蓋屋王扶陽陵嚴本杜陵屠門少

之屬

師古曰姓屠門名少

衆皆數千人假號稱漢將時李松鄧曄

以為京師小小倉尚未可下何況長安城當須更始帝

大兵到即引軍至華陰治攻具而長安旁兵四會城下

聞天水隗氏兵方到皆爭欲先入城貪立大功鹵掠之

利莽遣使者分赦城中諸獄囚徒皆授兵殺穢飲其血

與誓曰有不為新室者社鬼記之更始將軍史譙將度渭橋皆散走譙空還衆兵發掘莽妻子父祖冢燒其棺槨及九廟明堂辟雍火照城中或謂莽曰城門卒東方人不可信莽更發越騎士為衛門置六百人各一校尉

十月戊申朔兵從宣平城門入民間所謂都門也師古曰長

安城東出北頭第一門張卽行城門逢兵見殺師古曰行音下更反王邑王

林王巡薨惲等分將兵距擊北闕下漢兵貪莽封力戰

者七百餘人師古曰獲莽當得封故貪之而力戰會日暮官府邸第盡燔

亡二日己酉城中少年朱弟張魚等恐見鹵掠趨謹並

和

師古曰衆羣行謹而自相和也和音乎卧反

燒作室門斧敬法闔

師古曰敬法殿

名也闔小門也謂斧斫之也

諄曰反虜王莽何不出降

師古曰諄音火故反其下

亦火及掖庭承明黃皇室主所居也莽避火宣室前殿

火輒隨之宮人婦女號諄曰當奈何時莽紺袍服

師古曰號

古啼字也紺深青而揚赤色也袍純也純為紺服也袍音均又式旬反

帶璽韞持虞帝七

首天文郎按拭於前

師古曰拭所以占時曰天文郎今之用拭者也音式

日時加

某莽旋席隨斗柄而坐曰天生德於予漢兵其如予何

師古曰論語稱孔子曰天生德於予桓魋其如予何故莽引之以為言也莽時不食少氣困

矣三日庚戌晨旦明羣臣扶掖莽自前殿南下椒除服虔

曰邪行閣道下者也師古曰除殿陸之道也椒取芬香之名也西出白虎門和新公王

揖奉車待門外莽就車之漸臺欲阻池水猶抱持符命

威斗公卿大夫侍中黃門郎從官尚千餘人隨之王邑

晝夜戰罷極師古曰罷讀曰疲士死傷略盡馳入宮間關至漸

臺師古曰間關猶言崎嶇展轉也見其子侍中睦解衣冠欲逃邑叱之

令還父子共守莽軍人入殿中諄曰反虜王莽安在有

美人出房曰在漸臺衆兵追之圍數百重臺上亦弓弩
與相射稍稍落去矢盡無以復射短兵接王邑父子覺
惴王巡戰死莽入室下晡時衆兵上臺王揖趙博苗訢
唐尊王盛中常侍王參等皆死臺上商人杜吳殺莽取
其綬校尉東海公賓就故大行治禮師古曰公賓姓也
禮故識天見吳問綬主所在曰室中西北陬間師古曰
子綬也
音子侯反就識斬莽首軍人分裂莽身支節肌膚音鄒
爭相殺者數十人師古曰三輔舊事云鬻切千段公賓就持莽首詣王

憲憲自稱漢大將軍城中兵數十萬皆屬焉舍東宮

師古

曰舍止宿也

妻莽後宮乘其車服六日癸丑李松鄧曄入長

安將軍趙萌申屠建亦至以王憲得璽綬不輒上多挾

宮女建天子鼓旗收斬之傳莽首詣更始縣宛市百姓

共提擊之

師古曰提擲也音徒計反

或切食其舌莽揚州牧李聖司

命孔仁兵敗山東聖格死仁將其衆降已而歎曰吾聞

食人食者死其事拔劍自刺死及曹部監杜普陳定大

尹沈意九江連率賈萌皆守郡不降為漢兵所誅賞都

大尹王欽及郭欽守京師倉聞莽死乃降更始義之皆
封為侯太師王匡國將哀章降雒陽傳詣宛斬之嚴尤
陳茂敗昆陽下走至沛郡譙自稱漢將召會吏民尤為
稱說王莽篡位天時所亡聖漢復興狀茂伏而涕泣聞
故漢鍾武侯劉聖聚衆汝南稱尊號尤茂降之以尤為
大司馬茂為丞相十餘日敗尤茂并死郡縣皆舉城降
天下悉歸漢初申屠建嘗事崔發為詩師古曰就發學詩建至
發降之後復稱說師古曰妄言符命不順漢建令丞相劉賜斬發以

徇史譙王延王林王吳趙閔亦降復見殺初諸假號兵
人人望封侯申屠建既斬王憲又揚言三輔黥共殺其
主吏民惶恐屬縣屯聚建等不能下馳白更始二年二
月更始到長安下詔大赦非王莽子他皆除其罪故王
氏宗族得全三輔悉平更始都長安居長樂宮府臧完
具獨未央宮燒攻莽三日死則案堵復故更始至歲餘
政教不行明年夏赤眉樊崇等衆數十萬人入關立劉
盆子稱尊號攻更始更始降之赤眉遂燒長安宮室市

里害更始民饑餓相食死者數十萬長安為虛

師古曰虛讀曰

墟城中無人行宗廟園陵皆發掘惟霸陵杜陵完六月

世祖即位然後宗廟社稷復立天下艾安

師古曰艾讀曰又○劉攽

曰王莽三十八為大司馬五十一居攝五十四即真六十八誅死居攝三年號初始元年始建國五天鳳六地

皇四

贊曰王莽始起外戚折節力行以要名譽宗族稱孝師友歸仁及其居位輔政成哀之際勤勞國家直道而行動見稱述豈所謂在家必聞在國必聞色取仁而行違

者邪

師古曰論語載孔子對子張之言也不仁之人假仁者之色而所行則違之朋黨比周故能在家在

國皆有名譽故贊引之

莽既不仁而有佞邪之材又乘四父歷世

之權遭漢中微國統三絕而太后壽考為之宗主故得

肆其姦慝以成篡盜之禍

師古曰肆放也極也

推是言之亦天時

非人力之致矣及其竊位南面處非所據顛覆之執險

於桀紂而莽晏然自以黃虞復出也廼始恣睢奮其威

詐

師古曰睢音呼季反

滔天虐民窮凶極惡

師古曰滔漫也

毒流諸夏亂

延蠻貉猶未足逞其欲焉是以四海之內囂然喪其樂

生之心

師古曰器然衆口愁貌也

中外憤怒遠近俱發城池不守支

體分裂遂令天下城邑為虛

師古曰虛讀曰墟

邱壠發掘害徧

生民辜及朽骨自書傳所載亂臣賊子無道之人考其

禍敗未有如莽之甚者也昔秦燔詩書以立私議莽誦

六藝以文姦言

師古曰以六經之事文飾姦言

同歸殊塗俱用滅亡皆

亢龍絕氣非命之運

服虔曰易曰亢龍有悔謂無德而居高位也蘇林曰非命非天命之

命紫色蠅聲餘分閏位

應劭曰紫間色蠅邪音也服虔曰言莽不得正王之命如歲月

之餘分為閏也師古曰蠅者樂之淫聲非正曲也近之學者便謂蠅之鳴已失其義又欲改此贊蠅聲為蠅聲

引詩匪難則鳴蒼
蠅之聲尤穿鑿矣
師古曰言驅逐蠲
除以待聖人也

聖王之驅除云爾

蘇林曰聖王光武
也為光武驅除也



前漢書卷九十九下

前漢書卷九十九下考證

王莽傳下臨淮瓜田儀等為盜賊依阻會稽長州○胡三省曰今蘇州長洲縣即長州地

遂攻海曲縣殺其宰○李賢曰海曲故城在密州莒縣東臣召南按通鑑即書新市王匡王鳳南陽馬武潁川王常成丹等南郡張霸江夏羊牧等起兵於呂母之後

是歲赤眉力子都樊崇○劉攽曰力當作刁○

臣召南

按通鑑作刁子都然本文及後書並作力姓譜曰力姓黃帝臣力牧之後似力字不誤

翼平連率田況○胡三省曰据地理志北海壽光縣莽曰翼平又夙夜連率韓博夙夜東萊郡不夜縣莽改名也

乃身短衣小裋乘牝馬柴車○胡三省曰漢之盛乘牝牝者禁不得聚會鄉閭阡陌皆然朝市之間從可知矣唐尊為上公而乘牝馬亦以矯世也

因下書責七公曰○七公四輔三公也

燒作室門○程大昌曰未央宮西北織室暴室之類黃圖謂為尚方工作之所者也

持虞帝七首○胡三省曰虞帝安得有七首蓋莽自為之以愚人也

聞故漢鍾武侯劉聖聚衆汝南○通鑑考異曰劉聖後書劉元傳作望

前漢書卷九十九下考證